

**EKALESIA FAAPOTOPOTOGA KERISIANO
SAMOA**

**TUSI MO FAIA’OGA O A’OGA ASO SA
*SUNDAY SCHOOL TEACHERS TEXTBOOK***

2024



**VASEGA FEOLOLO
INTERMEDIATE CLASS
(11 – 13 tausaga)**

**MATAGALUEGA O A’OA’OGA KERISIANO
*DEPARTMENT OF CHRISTIAN EDUCATION***

**EKALESIA FAAPOTOPOTOGA KERISIANO
SAMOA**

**TUSI MO FAIA’OGA O A’OGA ASO SA
*SUNDAY SCHOOL TEACHERS TEXTBOOK***

2024



**VASEGA FEOLOLO
INTERMEDIATE CLASS
(11 – 13 tausaga)**

MATAGALUEGA O A’OA’OGA KERISIANO

UPU TOMUA

E mua'i faatalofa ma faafeiloai atu i le paia tele o le Ekalesia Faapotopotoga Kerisiano Samoa i ona tulaga faalupeina, i le Suafa pele o Iesu Keriso lo tatou Taitai Sili. Ua faamalo le soifua manuia ia outou susuga i Toeaina, susuga i Faafeagaiga, Faifeau, A'oa'o ma Faletua, tainane foi afioga i Tiakono, susuga i alii ma tamaitai Faiaoga o tatou Aoga Aso Sa, faapea foi peresetene ma taitai o tatou Autalavou. Ia viia lo tatou Alii, i la outou molimau atu, o fita i tuga ai mo le Alii ma le Tala Lelei, e ala atu i mataupu a le Aoga Aso Sa ma Autalavou.

Ua tatou talitonu, o le Tusi Paia o le Upu a le Atua mo tagata uma, ma ua i ai i totonu vaega uma ua tatou naunau ia iloa, ina ia tumau mausali pea lo tatou sootaga lelei ma le Atua, ma ia tatou ola ai i le ala tatau e tusa ma lona finagalo. O le mea lea ua tatou talitonu ai, i le matuā taua o le a'oa'oina tatau o fanau laiti ma talavou mai le Tusi Paia. E ao ina a'oa'oina atu ma le faautauta lelei, le uiga moni o vaega o le Tusi Paia ua fia a'oa'oina atu, i se auala talafeagai e tusa ma le matutua ua i ai tamaiti.

1. O le Tusi o Aoga Aso Sa ma Autalavou, ua saunia lava faapitoa mo Aoga Aso Sa ma Autalavou a le Ekalesia Faapotopotoga Kerisiano Samoa. O lona uiga o le meatotino lava a le EFKS, e le faatagaina faaletulafono ona toe lomua e se tasi, e aunoa ma le faatagaga a le Ekalesia. O lea e fautuaina ai foi le Aufaigaluega, o faiaoga o Aoga Aso Sa ma Taitai o Autalavou, i le taua o le teu faalelei pea o Tusi Aoga, e toe saili i ai mo se fesoasoani pe a moomia.

2. O Mataupu o Tusi Aoga Aso Sa ma Autalavou 2024, ua maua lea i le upega Tafailagi (website) a le EFKS; www.cccs.org.ws. Faamolemole ia fesoatai mai lo tatou Ofisa i Mulinuu mo se fesoasoani, ma nisi vaega e fia malamalama i ai, i le telefoni 24340, po o le e-meli-extneduc@cccs.org.ws.
3. Ua lē o toe fa'aalia i le faasologa o Mataupu i Aso Sa taitasi, vaega masani o le a'oa'oina o mataupu, e pei o le Tatalo Amata, Faafeiloai le vasega, faamanatu mataupu talu ai, tatalo e faapaia ai le sene ma le Tatalo Faaiu. Peitai o vaega masani nei e tatau lava ona fai i Mataupu o Aso Sa taitasi.
4. Mo le silafia e Tamā o le Ekalesia ma le aufaigaluega faifeau, e i ai le taimi e toe saili mai ai e lo outou mamalu le ofisa o le MAK, mo nisi Tusi Aoga. Peitai, ua māua e le ofisa nei, o nisi tagata, e lē o ni tagata lotu iā tatou, auā latou te leiloa le suafa o lana faifeau. O lea e tatalo atu ai, o le a lē toe taliaina ni tagata faapea e omai i ni Tusi, sei vagana faafeagaiga ma ē omai ma se faamaoniga mai lana faifeau. E lē mafai foi ona faamatuu atu ni Tusi Aoga i nisi o la matou aufaigaluega e aunoa ma se faamaoniga mai le faifeau.
5. Afai ua i ai se lape i le galuega nei, e matua atu i la outou tofā faale-Atua e magalo ai le aufaigaluega vaivai. Pe afai foi e i ai ni fautuaga taua mo le faaleleia atili o le galuega, faamolemole fesoata'i mai lo tatou Ofisa i tuatasi o i luga, pe lafo mai i le Pusa meli 163, Apia.

6. Ua saunia le Tusi Aoga mo le Vasega Feololo e le susuga ia Semikueva Su'a FS, Faalefu Tumutalie FS ma Oli Levi FS.

Ia faamanuia le Atua i le galuega o lenei tausaga, auā le a'oa'oina o alo ma fanau a le Ekalesia, ina ia tutupu a'e ma le fiafia e faitau le Tusi Paia ma ola matata'u i le Atua.

Soifua ma ia manuia
O la outou auauna

Maleifua Tanielu

(Faatonu A'oa'oga Kerisiano)

VASEGA FEOLOLO 2024

MANATU AOAQ: “O LE ATUA E ANA MEA UMA”

MANATU TAIALA O IANUARI & FEPUARI: FAALOGO I LE ATUA

IANUARI:

28 Ua faaigoa e le Atua ana mea totino Kenese 1:1-10
(Aso Sa o Tupulaga)

FEPUARI:

04 Aua le fia poto i le na tofia e le Atua
Numera 12:1-10
11 E puipui e le Atua ona tagata 1 Samuelu 7:7-14
18 O ai e faaosooso i tatou i le leaga? Iakopo 1:12-15
25 Fai se mea lelei e manatua ai oe Mareko 14:3-9

MANATU TAIALA O MATI: O LE FAAOLATAGA A LE ATUA.

MATI:

03 O le Atua ma lana fa’amasinoga tonu
Esekielu 18: 1-5, 9
10 A’oa’oga i le amio fa’afoliga Luka 6:37-38
17 Ave fuafua Esoto 16:11-20
24 O le malaga a Iesu i Ierusalema Mareko 11:1-10
(Aso Sa Laupama)
31 E lē o iinei o Ia Mataio 28:1-10
(Aso Sa Toetu)

MANATU TAIALA O APERILA: O LE ATUA E AUAI MAI.

APERILA:

07 O le manumalo mai le tumutumu mauga
Esoto 17:8-16
14 Ua faasesēina i le fia Atua Kenese 3:1-6
21 O meaai na saunia e le Atua 1 Tupu 17:1-7
28 E lē fa’ailoga tagata Iesu Kalatia 3:23-29

MANATU TAIALA O ME: O LE ATUA FAAOLA.

ME:

05 O le faaosoosoina o Iesu Mataio 4:1-11
12 O le tatalo a Hana 1 Samuelu 1:10-18
(Aso Sa o Tinā)
19 (Aso Sa Fono Tele)
26 Ia loto fa’amagalo Kenese 45:1-8

MANATU TAIALA O IUNI: IA FAAMOEMOE I LE ALII.

IUNI:

02 O le manumalo o Tavita ia Koliata 1 Samuelu 17:44-50
09 Ua faamalosi Iosua ma Kalepo i le nuu
Numera 14:1-10
16 Ua savali le pipili Galuega 3:1-10
23 O Isaraelu ma le tama’i povi auro Esoto 32:1-6
30 O le faafiti a Peteru Mataio 26:69-75

**MANATU TAIALA O IULAI:
NA FAIA E LE ATUA MEA UMA.**

IULAI:

07	Ua faamālōlō e Iesu le lima gase	Mareko 3:1-6
14	Ua vaelua e Mose le sami ulaula	Esoto 14:15-22
21	Ua vavao e Iesu le matagi ma le vai	Mataio 8:23-27
28	Ua a'oa'oina Nepukanesa	Tanielu 3:28-30

**MANATU TAIALA O AOKUSO:
SO'OTAGA O LE TAGATA MA LE ATUA**

AOKUSO:

04	Tapua'i ma le loto mamā	Ieremia 7: 3-15
11	Alu i le fale o lo'u tamā (Aso Sa o Tamā)	Luka 2: 41-52
18	O le tatalo a Neemia	Neemia: 5: 11
25	Ua faatumuina Iesu i le Agaga Paia	Mataio 3:13-17

**MANATU TAIALA O SETEMA & OKETOPA:
TALA FIAFIA O LE FAAOLATAGA**

SETEMA:

01	O le molimau a le fitafita (Aso Sa Tala Lelei)	Luka 23: 44-49
08	O Euta le Faamasino	Faamasino 3: 15-30
15	E le o le ofutau ma le malosi	1 Tupu 20: 1-12
22	O le malosi o le alofa	Sakaria 10: 1-12
29	Ia mataala i taimi uma	Galuega 20: 7-12

OKETOPA:

06	(Tapenaga Lotu Tamaiti)	
13	LOTU TAMAITI	
20	MALOLOGA LOTU TAMAITI	
27	E le tauanaina le taimi a le Atua	Salamo 39: 4-6

**MANATU TAIALA O NOVEMA:
FA'APAIAINA LO TATOU OLA I ASO UMA**

NOVEMA

03	O le Atua le Foma'i Sili	Nuera 21: 4-9
10	O le laulaufaiva o le afi	Iakopo 3: 1-6
17	Ia fai i tatou ma auauna	Ioane 13: 1-11
24	O le Sapati	Levitiko 23: 1-3

**MANATU TAIALA O TESEMA:
UA IA TE I TATOU LE ATUA.**

TESEMA:

01	Ua liu tino tagata le upu	Ioane 1:1-5
08	Ua fa'aali le agelu ia Iosefa	Mataio 1:18-25

VASEGA FEOLOLO 2024

MANATU TA'IALA O IANUARI & FEPUARI: FAALOGO I LE ATUA.

O le faalogo, o se amio po o se faatonuga e tatau mo tagata uma. O le sa'o ma le atoaatoa o se faatinoga, ina ua lelei le faalogo. Peita'i, e tatau lava foi ona fuaina lē e faalogo i ai. O fanau, e faalogo i matua, o le faiaoga, ma tagata e matutua i totonu o so o se si'osi'omaga ma faalapotopoto, e oo lava foi i totonu o aiga. A'o tagata uma lava, e faalogo uma i le Atua, auā o mea ia e manuia ai le tagata e faavavau.

ASO SA: 28 IANUARI 2024.
(ASO SA O TUPULAGA)

MATAUPU: UA FAAIGOA E LE ATUA ANA
MEA TOTINO

SINI: Ia malamalama le vasega, na fa'aigoa e le Atua ana mea na fai, ina ia iloa ai, ma fa'aailoa ai o Ia lava e pule ai.

TUSI FAITAU: Kenese 1: 1 – 10

FESOASOANI MO FAIAOGA:

O le mataupu o lenei aso Sa, o lo o faatatau i le faaigoaina e le Atua o ana mea na Ia faia i le amataga. Ua faalogo soo i tatou i le tala i le foafoaga, e faamatalaina ai le Atua ma lona silisiliese, na Ia faia ai le lagi ma le lalolagi i le amataga. Peita'i, e ao foi ona se'i o tatou iloa, i le tāua o le faaigoaina e le Atua o mea uma lava na Ia faia.

O le tāua o le fa'aigoaina o se tagata, e iloa ai lea tagata. Aemaise, ina ia manatua ai pea le sootaga o lē ua fa'aigoa, po o se mea ua fa'aigoa, ma lē na ia fa'aigoaina.

Fa'ata'ita'iga: E fa'aigoa e matua a latou fanau, e valaauina ai ma fa'aailoaina ai. E lē gata i lea a ua manino mai ai, o lē ua fa'aigoaina, o se mea totino a matua na fa'aigoaina.

O le fa'amoemoe foi lea o lo o fa'atatau i ai le mataupu o lenei aso Sa. Se'i toe faamanatu i fanau, le tāua na fa'aigoaina ai e le Atua mea o lana foafoaga na faia i le amataga. E toe fa'aailoa pea i fanau, afai o le Atua na fa'aigoaina vaega o le foafoaga, o lona uiga o le Atua foi e anaina. A'o i ua manino mai ai, le fa'aailoaina o lē ana ia mea (ownership claim).

O le malamalama ma le pouliuli, o vaega tetele ia e lua na faaigoa e le Atua i le amataga, e pei ona i ai le “ao” ma le “po”. O lona uiga, o le ao ma le po, o meatotino a le Atua.

Ina ua uma ona vavae e le Atua vai i luga o le va nimonimo ma vai i lalo o le va nimonimo, ona Ia faaigoa lea o luga atu o le va nimonimo, o le “lagi”. O le lagi foi la, o le meatotino a le Atua. O isi vaega tetele na faaigoa foi e le Atua, o le “eleele” ma le “sami”. O isi foi meatotino a le Atua. A silasila manino lava la i ai, ua taoto mai ai, o le lagi, o le laueleele ma le sami, o nofoaga tetele ia o le foafoaga a le Atua na Ia faaigoa i le amataga, ina ua mae'a ona Ia saunia ma faaigoa le ao ma le po, e fa'amalamalamaina ma fa'apogisaina.

Ua va'aia pea le tulaga aafia o le ola i aso uma, ona o tulaga mā'aleale ma le ogaoga o suiga o le tau. Ua mafua, ona ua tele le fa'aleaga a le tagata, i le siosiomaga. Peita'i o le siosiomaga, ua faamanino mai ina ua fa'aigoaina e le Atua i le amataga, o le Atua lava e anaina. O lona uiga, ua fia pule le tagata, ma ua so'ona sauā ae lē o ni ana meatotino o loo so'ona sauā i ai.

I le amataga o feau o lenei tausaga i totonu o lenei vasega, ua manatu ai ina ia fai o se molī o lo o emoemo mai pea, e fai ma faamanatu i fanau, ina ia se'i tautuanā le foafoaga ma le siosiomaga, o meatotino a le Atua, e pule ai foi le Atua.

GALUEGA FAATINO: FA'AILOA OE

Tu'u le avanoa i le vasega, e ta'ito'atasi ma fa'ailoa e le tagata ia lava. O lona igoa ma le mafuaaga o lona igoa, o le feso'ota'iga o lona igoa ma lona aiga, o ona matua, o lona nuu ma lana Ekalesia.

PESE: Na faia e le Atua mauga maualuluga
(God make the mountains high)

A'OA'OGA:

1. O le pule aoao a le Atua, e i mea uma lava.
2. Aua le fa'aleagaina mea totino a le Atua.

.....

ASO SA: 04 FEPUARI 2024.

MATAUPU: AUA LE FIA POTO I LE NA TOFIA
E LE ATUA

SINI: Ia malamalama le vasega, e leaga le fia sili i le ua filifilia e le Atua.

TUSI FAITAU: Numera 12:1 – 10

FESOASOANI MO FAIAOGA:

O le vaivaiga lava o le tagata, o le fiasili ma le vaai maualalo i le isi tagata. O loo manino le tala o le mataupu, fai mai ua muimui Miriama ma Arona ia Mose. O Miriama o le tuafafine o Mose, a'o Arona o le uso o Mose. O i laua nei o le Perofeta ma le Ositaulaga, o nisi ia o la tulaga maualuluga o le nu'u, e tu lata ane i le pule fa'a-ta'ita'i ia Mose. Peita'i, ua fa'asea Miriama ma

Arona ona ua la naunau foi i le pule fa'a-ta'ita'i. Ua taumafai Miriama ma Arona e saili se auala e ta'u-leagaina ai le ta'ita'iga a Mose. Pei ona la molia ai Mose i le faiaiva i le fafine nu'u ese, o se aga e le tatau mo le Isaraelu auā e sa i le tulafono.

Na silafia e le Atua le muimui a Miriama ma Arona. Ua foliga mai ua la fesiligia le pule ma le ta'ita'iga a le Atua lea na filifilia ai Mose e fai ma auaua e ta'ita'i Isaraelu. Auā o le Atua na valaauina Mose e ave'esea mai le nu'u i le mea sa nofo pologa ai. O le pule foi a le Atua, e le fesiligia e se tasi. Na fa'ailoa e le Atua ia Mose, Miriama, ma Arona, o le perofeta a le Alii o ia te outou, o ia lena ou te fa'ailoa ai i fa'aaliga ma miti. E pei o lana auaua o Mose na la fesaga'i ma fetautalatalaa'i. O le auaua fa'amaoni e le muimui e pei o Miriama ma Arona. Na o'o le tino ma'i ia Miriama ona o le ola tau-fa'a-leaga ma le ola muimui ia Mose. Peita'i, na alofa lava Mose i lona uso ma lona tuafafine, ma ia ole atu i le Atua e fa'amalōlō ia Miriama. Na fa'afogaina lava e le Atua le alaga a Mose, ona o le auaua e fa'amaoni.

GALUEGA FAATINO: Tali i le Sa'o po'o le Sese

1. Na muimui Miriama ma Mose i le Atua ona o le fia ta'ita'i.

Tali: *Sese*

2. O Arona o le Ositaulaga.

Tali: *Sa'o*

3. O Miriama o le tuafafine o Mose ma Arona.

Tali: *Sa'o*

4. E le'i ma'i Miriama i se ma'i lepela.

Tali: *Sese*

PESE: O le Atua Silisiliese (My God is so Great)

A’OA’OGA:

- 1. Aua ne’i fesiligia le finagalo o le Atua.
- 2. E i’u leaga le tagata muimui ma le tau fa’aleaga.
- 3. E alofagia e le Atua le tagata fa’amaoni.

.....

ASO SA: 11 FEPUARI 2024

MATAUPU: E PUIPUI E LE ATUA ONA TAGATA

SINI: Ia malamalama le vasega, o le Atua e lē gata e fesoasoani ma alofa, ae fa’afogaina mea uma tatou te ole atu ai.

TUSI FAITAU: 1 Samuelu 7:7 – 14

FESOASOANI MO FAIAOGA:

O le oo ane o le tala ia Filisitia e uiga ia Isaraelu ua faapotopoto uma e Samuelu i Mesepa, na latou taupulepule ai mo se osofa’iga e tau ma Isaraelu. Na fa’alogo i ai Isaraelu ua fofou mai Filisitia e tau le taua ma i latou. Na tupu ifo ia Isaraelu lagona o le fefe ma le le mautonu ona o le mata’utia o Filisitia. Ona augani lea o le fanauga a Isaraelu ia Samuelu, ina ia valaau ma ole atu i le Atua e lavea’i, fesoasoani, ma fa’aola mai i latou mai lima sauā o Filisitia.

E le’i toe fa’atali Samuelu, ae ua tula’i ma ave le tama’i mamoe o lo’o susu, ma fai ai le taulaga mu, ma ia alaga atu i le Atua o Isaraelu. Na fa’afogaina e le Atua le valaau atu a Samuelu. A o faia le taulaga mu ma tatalo Samuelu i le Alii, o le taimi foi lea ua latalata ane i ai Filisitia. O le mea ua tupu, fai mai ona

fa’afuase’i ai lea ona pa leo tele o le faititili ma ua ta’alili tele i luga o le au tau a Filisitia. O le malosi ma le leo tele o le faititili mai le Alii, na fa’ata’apeapeina ai le au tau a Filisitia i luma o Isaraelu.

Na omai Isaraelu uma na i Mesepa ua tuliloa, ua fasia ma ua fa’ato’ilalo Filisitia. Ina ua uma, ona avane lea e Samuelu le ma’a ma ua fa’atuina i le va o Mesepa ma Sena e fai ma ma’a fa’amanatu, ma fa’aigoaina o “Epenesa” auā sa fesoasoani le Alii ia i latou. E le gata na fa’ato’ilaloina Filisitia ma lana au tau, a o fanua uma na faoa e Filisitia, ua toe foi uma ia Isaraelu.

GALUEGA FAATINO: Taliga fesili

- 1. O ai na fa’apotopotoina Isaraelu i Mesepa?
Tali: *O Samuelu*
- 2. O ai na fefefe ai Isaraelu?
Tali: *O Filisitia*
- 3. O le a le mea na faia e Isaraelu ina ua fa’a-mata’u mai Filisitia?
Tali: *Na fai le taulaga ma tatalo i lo latou Atua e fesoasoani mai.*
- 4. O le a le igoa o le ma’a fa’amanatu e pei ona faia e Samuelu?
Tali: *O Epenesa*
- 5. O le a le uiga o le igoa o le ma’a?
Tali: *Aua sa fesoasoani le Alii.*

PESE: O le Atua Silisiliese (My God is so Great)

A’OA’OGA:

1. E le tu'ulafoa'ia e le Atua i tatou o lana fanau.
2. E fa'afogaina e le Atua a tatou tatalo.
3. E fesoasoani le Atua i o tatou taimi faigata.

.....

ASO SA: 18 FEPUARI 2024

MATAUPU: O AI E FA’AOSOOSO I TATOU I LE LEAGA?

SINI: Ia malamalama le vasega, e lē fa’asoosoina i tatou e le Atua i ni mea leaga.

TUSI FAITAU: Iakopo 1:12-15

FESOASOANI MO FAIAOGA:

O le lalolagi lenei tatou te i ai, o lo'o tatou ola nei i se olaga o fete'enai'ga o mea lelei ma mea leaga. O le olaga o mea e tatau ona tatou faia tatou te maua ai lo tatou Alii o Iesu, a ua tele ina fa'alavelaveina i tatou e le tiapolo ia po'o Satani foi. O le mea lea e taua tele ai le fa'amanatu mai a Iakopo i lana tusi sa tatou faitauina i lenei taeao, e uiga lea i le tulaga tau i fa'asoosoga atoa ai ma le tulaga e ta'u o le tofotofoina o le tagata.

O lo o manino mai i le tatou tusi faitau, e le fa'asoosoina se tasi e le Atua e fai se mea leaga. Peita'i o le mea mautinoa, e fa'asoosoina le tagata e Satani, ona ua tosina lona loto i le tu'inanau. Lea e fai mai ai le fuaiupu e 15: “Pe a to le tu'inanau ona fanau mai ai lea o le agasala, a matua le agasala, ona fanau mai ai lea o le oti”.

O mea lava ia e lua, e tele ina fefinaua'i i taimi ma aso uma o lo tatou ola. O le fa'asoosoga mai le tiapolo ina ia fai le leaga, ma le onosa'i i le tu'inanau leaga e i'u ai i le agasala ma le oti. Peita'i, o le tagata lava e tumau ma pipi'i i le Alii, e lagona e ia le alofa moni i le Alii, e mautinoa e le mafai ona sese pe pa'u atu i le fa'asoosoga a le fili ma le tiapolo. O le tagata e sao mai i ia fa'asoosoga uma, o ia foi lava lea ua ta'ua ua manumalo i tofotofoga. A o lea ua ta'ua mai e Iakopo, o le tagata ua manumalo i le tofotofoga, e maua e ia le pale o le ola.

Ioe tamaiti, o le tumau i le Alii, tatou te manumalo ai i mailei ma fa'asoosoga leaga a le tiapolo. Aua ne'i tu'inanau gofie i tatou i mea leaga o lenei lalolagi. Auā a to le tu'inanau ona fanau mai ai lea o le agasala, a matua le agasala ona fanau mai ai lea o le oti. Ae a tumau pea tatou i le Alii e ala i le tatalo, ma toaga i le lotu, aoga Aso Sa, usita'i i matua, fa'aaloalo i so'o se tagata, e manumalo foi i tatou i tofotofoga uma ma maua ai e i tatou le pale matagofie o le ola e fa'avavau, ua folafola ma saunia e le Alii mo'i tatou o lana fanau.

O ai la e fa'asoosoina i tatou? O le tali, e lē o le Atua, a'o le ti'āpolo po o Satani.

Uiga o Upu:

- i) onosa'i - fa'apalepale
- ii) fa'asoosoga - manaoga po'o tu'inanau lē lelei
- iii) tofotofoina - su'esu'e
- iv) to le tu'inanau - ua tele nauā mana'oga lē lelei.

GALUEGA FAATINO: Fa’aaoga i fuaiupu.

Fa’aaoga mai upu ua tuuina atu i ni au fuaiupu. Tofu le upu ma le fuaiupu.

Upu: onosa'i, fa'asoosoga, tofotofoina

PESE: Ou te tumau ma pipi'i mau
Ou te tu mau ma pipi'imau
Le lalolagi taumafai e liliu ese a'u
Ou te tumau ma pipi'imau.

A'OA'OGA:

1. Ia fa'alagolago i le Alii i so'o se mea e te manatu i ai.
2. Aua le fa'amoemoe i lou lava atamai.
3. O Iesu le pogai ma le puna o manuia mo lo tatou ola.

.....

ASO SA: 25 FEPUARI 2024

MATAUPU: FAI SE MEA LELEI E MANATUA
AI OE

SINI: Ia malamalama le vasega, o le ta'uleleia
o se meaalofa e manatua ai oe.

TUSI FAITAU: Mareko 14:3-9

FESOASOANI MO FAIAOGA:

O le tatou mataupu o lenei aso, "Fai se mea lelei e manatua ai oe". O le fesili, o le a se mea lelei na e faia o e manatua? O le tala lea na tatou faitauina, o le fafine ma le fagu alapasa. Fai mai a'o i ai Iesu i le fale o Simona le lepela, na afea ai e le fafine lea ma lana fagu alapasa. O lea fagu o lo'o i ai le u'u manogi ma e fai si taugata tele o lea fagu i lea vaiata. O le galuega la a le fafine lenei, fai mai e le'i vaai lava le fafine i le taugata a ua ia tata'e le fagu ma ia fa'aoga loa le u'u manogi e liligi i le ao (ulu) o Iesu. O se gaoiga po'o se galuega lelei tele lea na faia e le fafine i le finagalo o le Alii. Peita'i, i le vaai

fa'a-le-tagata a le au so'o, fai mai na matua tigā o latou loto ma latou fa'apea ifo ia Iesu, pe aiseā ua ma'umau ai le fagu taugata pe ana fa'atau ua maua ai ni tupe e tufa ma e matitiva.

E ese lava le vaai a le tagata ese foi le silasila a Iesu. Fa'auta o le tali a Iesu, ina ia tu'u pea ia, ma le mea lelei ua ia faia ia te Ia. O le uiga o le manatu o Iesu, ua ia fa'aali manino i lona au so'o tou te mafuta pea ma tagata i aso uma, e mafai ai ona outou fesoasoani atu i ai. A'o le mea ua faia e le fafine, e manatua ai pea o ia i le galuega fa'a-so'o. O le galuega lelei na faia e le fafine, o le fa'ata'imuaga lea o le maliu o Iesu. O le galuega e manatua pea pe a tatou mafaufau i le maliu ma le toetu o le Alii. O le uiga lea o le tali a Iesu na tali ai i lona au so'o ina ia o latou malamalama i ai, aua o latou e fa'aauauina le galuega.

A'o se a'oa'oga lelei foi mo tatou, ia o tatou ola ma mafaufau po'o le a se mea lelei ua e faia mo ou matua ma lou aiga. O lo'o tautiga o outou matua e saili tupe e totogi ai le aoga ma fa'atino mea tou te manana'o ai. Ae o le a sau mea lelei e te tali atu ai? Ia outou maua le ola fa'alogu ma usita'i, fai lelei lau amio ma ia e toaga e fai au meaaoga ona e maua lea o le potu ma maua ai lau galuega e tausi ai lou aiga. Ia e mafaufau lava oe i sau mea lelei e fai mo ou matua, o lou aiga, o lau Ekalesia ma lou nu'u po'o le atunu'u foi, ae sili ai o sau mea lelei e fai mo le Atua.

GALUEGA FAATINO: Tala Toe-faamatala

Ia tu'u le avanoa i tamaiti e toe fa'amatala mai ai le tala sa fa'amatala, ae fa'aoga mai se pepa e tusi mai ai, ia le silia ma le tasi se parakalafa.

PESE: Olioli i le Alii...
Olioli i le Alii o lo'u malosia lea x2
Olioli i le Alii o lo'u malosia lea x2

A’OA’OGA:

1. Ia agalelei ma fesoasoani i so’o se tagata
2. Ia taumafai e fai se mea lelei mo ou matua.
3. Aua le vaai fa’atauva’a i le isi tagata o lo’o faia se galuega lelei.

.....

MANATU TA’IALA O MATI: O LE FAAOLATAGA A LE ATUA.

Ua manino i le Tusi Paia, o le Atua lava na faia mea uma lava i le lelei ma le mananaia. Peita’i, sa galue ai foi ma Satani, i le taumafai ina ia fa’aleagaina. Ua oo ai lava ina fa’aaogaina le tagata e fai ma mea faigaluega a Satani, e fa’aleaga mea na faia e le Atua, ma ua agasala ai. ma o le mafuaaga lea o le finagalo o le Atua, ina ia faia le fa’aolataga, mo le tagata ma mea uma ua fano, ona o le fili ma le ti’apolo.

ASO SA: 03 MATI 2024

MATAUPU: O LE ATUA MA LANA FAAMASINOVA TONU

SINI: Ia malamalama le vasega, ua na o le Atua e tonu lana faamasinoga.

TUSI FAITAU: Esekielu 18: 1 – 5, 9

FESOASOANI MO FAIAOGA:

O le mataupu o lenei Aso Sa, o le feau o loo folafola atu e le Perofeta o Esekielu i tagata o le nu'u o le Atua, po o tagata o Isaraelu, a'o i ai i latou i Papelonia ona o le tafeaga. O lea ua

amata lava le mataupu e 18, i le fesili a le Atua e ala atu i lana auauna, mo tagata o lona nu'u. Po'o ai na fai atu a 'ai e matua le vine moto, ona magiagia ai lea o nifo o le fanau. Auā o le talitonuga lea o Isaraelu na o latou manatu ane ai, ua mafua ona fa'atafea ma ola pologa Isaraelu po'o ituaiga e 10, ona o le agasala a Reopoamo. Ae ua mafua ona tigaina ma pologa Iuta, ona o le agasala a Iuta ma Peniamina. O le manatu lea ua afua ai ona fesili le Atua. I le finagalo o le Atua, o Ia e faia le fa'amasinoga, ma o lana fa'amasinoga foi e amiotonu lava. Ae o lea ua foliga mai i lenei fa'aupuga, ua tu'umaulaloina ai lona tulaga Atua ma lana fa'amasinoga amiotonu. Ma ua foliga mai ai o Ia o se Atua sauā ma le lē alofa.

Lea la ua fofola atu e le Atua le fala e auala atu i lana Perofeta ma fa'aילו i lona nu'u le sese o lea manatu. E pei ona ta'ua i le fuaiupu e 4-13, ua fetalai mai le Atua, *“Fa'auta o agaga uma, o o'u lava i latou, e pei o le agaga o le Tamā ona fai mo'u, e fa'apea foi le agaga o le atali'i; o le tagata agasala, e oti ia. Ae afai e amiotonu le tagata ma ua faia le amio e tatau ma le amiotonu; e ola lava ia.”* O lea ua fa'amanino mai e le Atua, e leai se mea o le a afaina ai fua le isi tagata, ona o le agasala a le isi tagata. O le uiga o lea manatu, afai lava e amio leaga le tamā ma lē fa'alogi i le Atua, e i luga lava o ia ona leaga. Ae afai e fa'alogi ma usita'i le atali'i, ma mata'u i le Atua, e i luga foi o ia ona manuia.

O le faamasinoga tonu ma amiotonu lena a le Atua i le tagata. Ae lē o tulafono ma muāgagana e faia e tagata, ma fa'asesēina ai isi tagata.

GALUEGA FAATINO: Taliga fesili

1. O le a foi le muagagana fa'a-lutaia lea ua fa'asesē e le Atua?
- Tali: Ua aina e tamā o vine moto, ae magiagia ai nifo o le fanau.

2. O le a le finagalo o le Atua i lea mau e pei ona ta'ua i le mataupu?

Tali: E i luga lava o le tagata lona tau e tusa ma ana amioga.

3. O a o tatou tiute fa'a-le-fanau e pei ona fa'amatalaina i le tala?

Tali: O le usita'i ma fa'alogoa, to'aga i le aoga, alofa i matua ma alofa i le Atua.

4. Tauloto fa'atasi mai le tulafono e lima.

PESE: Ou te lē fa'atali se'i o'u matua

A'OA'OGA:

1. Ia tatou alolofa i o tatou matua.
2. E tau mai i tatou e le Atua, e tusa ma a tatou fa'atinoga.

.....

ASO SA: 10 MATI 2024

MATAUPU: LAPATA'IA I LE AMIO
FA'AFOLIGA

SINI: Ia malamalama le vasega, i le fa'amanoina e Iesu o foliga ma uiga o le tagata e amio fa'afoliga.

TUSI FAITAU: Luka 6: 37 – 38

FESOASOANI MO FAIAOGA:

O uiga uma lava e fa'aalia o le tagata, e mafua ma fa'apogai uma mai i le loto. A lelei le loto e lelei foi mea e fai. Ae a leaga

le loto ua leaga foi mea e fai e le tagata. O le ola fa'afoliga, o uiga ia na atagia i le olaga o le au Faresaio ma le au Tusiupu i le taimi o Iesu ma lana galuega fa'aola. O ni tagata e teuteu lumafale ae fa'aletonu le anofale. E lelei mai i le vaa'iga o mata a'o totonu o le loto o lo o mumū ai le afi. E aulelei fafo ae auleaga totonu. A'o le mea e sili ona leaga i le taimi o Iesu, e tausolomua i ta'ita'i o le lotu Iutaia ituaiga uiga ia. O tagata ia na fai ma fa'alavelave i le galuega a Iesu.

O le tele lava la o a'oa'oga ma mea na faia e Iesu, na ia lu'iina ai le ituaiga olaga lea na ola ai tagata nei i lona vaitau. I le vaega lea o le mataupu sa faitauina, o lo o aumai ai ni fa'ataoto a Iesu e fa'amatala ai le uiga o le ola fa'afoliga o le tagata. O le galuega la a Iesu, o le taumafai lea ina ia suia olaga o tagata, auā o lana misiona lea i le lalolagi, o le fa'aolaina lea o agaga o tagata. Ia suia mai i le leaga i le lelei, ma suia mai le pologa i le sa'oloto. Auā o le o'o mai o Iesu e tusa o le molimau a Luka, e lē fa'apito na o se vaega o tagata, a'o le afio mai o Iesu ma aumai le fa'aolataga, e mo tagata uma. O le isi mea tāua, na o'o lava i so'o na filifilia e Iesu, na maua foi ia i latou uiga ia. Na silafia lelei lava e Iesu mea uma na tutupu i lona au so'o. A'o le uiga moni ia o ana a'oa'oga, na mamafa lava i lona au so'o auā o i latou e fa'aauauina le galuega.

O mea na tutupu i le taimi o Iesu, o mea lava foi ia o lo'o tupu i o tatou foi taimi. O uiga lava ia o le ola fa'afoliga o tagata. Ae ia tatou iloa, o le o'o mai o Iesu e tusa ai ma fa'amaumauga a le Tusi Paia, na suia uma ai mea uma o le foafoaga ma le tagata. E ui lava la o uiga ma amioga a le tagata, a ua faia e Iesu le fa'aolataga mo tagata uma.

GALUEGA FAATINO: FAUSIA O LAPATA'IGA
(Create Awareness)

Ia galulue le vasega, ina ia taumafai e fausia ni lapata'iga. Tatala le avanoa i so o se mea o lo o fia ave i ai le lapata'iga.

PESE: Tulei ese.....

A’OA’OGA:

1. Alu ese mai le ola fa’afoliga.
2. Aua e te fa’amasino atu i le isi tagata.

.....

ASO SA: 17 MATI 2024

MATAUPU: AVE FUAFUA

SINI: Ia malamalama le vasega, i le tāua o le fa’aaoga tatau o mea ua foa’i mai e le Atua mo le aso.

TUSI FAITAU: Esoto 16: 11 – 20

FESOASOANI MO FAIAOGA:

O le “ave fuafua”, lona uiga, ia ave na o mea e mana’omia mo le aso. O le masani lava a o tatou tagata, a o’o ina maua ni fa’amanuiaga e pei o tupe, o meaai, ma isi, e fiafia lava e talia. Peita’i, e vaai atu loa ua tele, ona mana’o loa lea e toe fa’aopoopo mai sina isi vaega ma ia. Ma o le mea tonu lava lena e ta’u o le fa’aloloto. E mafaufau lava na’o ia ae lē vaai i isi tagata. E lē fa’amalieina le loto i se mea ua maua i lea aso, ae mana’o foi ma mafaufau i mea mo le isi aso.

O le tusi o Esoto, o tala o le o ese mai o Isaraelu mai Aikupito i le mea sa nofo pologa ai i lalo o le ta’ita’iga a le tupu o Farao. O le tala sa faitauina, o le fafagaina e le Atua o Isaraelu i le taimi a’o i ai i latou i le vao. Fai mai ina ua fia a’ai le nu’u, o i’ina na lagona ai e Mose ma Arona lo latou muimui ma fa’apea ifo, ana matou oti lava i Aikupito, a’o matou nonofo

latalata i ulo e tunu ai tufaga. Na lagona e le Atua le muimui o Isaraelu. O lea na Ia fetalai ai ia Mose i le mea e ao ona ia ta’u atu i le nu’u.

Ina ua fafagaina le nu’u, na alu atu fa’atasi ai lava ma le poloaiga, ia fa’aputu i ai e ta’itasi le tagata e tusa ma lana e ‘ai ai, o le omera foi ma le tagata. O lona uiga, e fua lava le meaai e tatau mo le taimi ma le aso ua fa’atulaga. O le fa’atonuga lea a le Atua na ia tofotofo ai lona nu’u pe fa’amata e usita’i. Peita’i, e le’i usita’i Isaraelu ia Mose. Sa o latou fa’atotoe lava meaai mo le isi aso, ma o le mea ua tupu fai mai ua manogi ma ua lē tatau ona toe fa’aaogaina.

Tamaiti, o le mea tāua ia tatou iloa, o le finagalo tupito o le Atua mo lona nu’u, ia ola fa’alogo ma usita’i, ma ia savavali e tusa ma ala o le Atua. E fa’apea foi tatou, e tatau foi ona tatou fa’alogo ma usita’i i matua aua o sui vaaia ia o le Atua i totonu o aiga, ma ia fa’amalieina tatou i mea ua maua i lea aso ma lea aso, aua o le aso lava ma mea e foa’i mai e le Atua mo i tatou. Aua le na’omeaai, a ia ai i meaai ua faasoa mai e le Atua mo le aso.

GALUEGA FAATINO: Faatumu avanoa.

Fa’atumu avanoa i upu nei, o fuaiupu o lo’o i le tusi faitau *eleele, togalauapi, sau, ufitia, fogaelele, sauto’a, salu, fa’apotopotoga*

Ua o’o i le afiafi ona a’e mai lea o ____, ua _____ ai le _____, o le taeao foi ua toto ai le ____, ua sioina ai le togalauapi. Ua alu ae foi le sau sa toto, fa’auta, o le _____, ua i ai ni mea iti _____, e laiti pei o le _____ i luga o le _____.

PESE: Lo’u Atua e, ua ou fia ‘ai ia e fafaga ia te a’u x2
Lo’u Atua e, ua ou fia ‘ai ia e fafaga ia te a’u
Fafaga ia te a’u i aso uma o lo’u olaga.
Fafaga ia te a’u i le manai mai luga

Fafaga ia te a'u i au Afioga
Fafaga ia te a'u i aso uma o lo'u ola.

A'OA'OGA:

1. E taua le fa'alogu ma usita'i i le Atua.
2. Ia tatou iloa, e foa'i mai e le Atua mea e tatau mo lea aso ma lea aso.
3. Aua tatou te naunau tele ae ia tatou iloa fa'afetai i le Atua e tusa ma lona alofa mai.

.....

ASO SA: 24 MATI 2024 (Aso Sa Laupama)

MATAUPU: O LE MALAGA A IESU I IERUSALEMA

SINI: Ia malamalama le vasega, o le malaga a Iesu i Ierusalem, o le malaga faa-tupu e fa'aola tagata uma.

TUSI FAITAU: Mareko 11:1 – 10

FESOASOANI MO FAIAOGA:

O le malaga fa'a-tupu leni a Iesu e pei ona fa'amatalaina e Mareko, ua taunu'u ai le valo'aga na valo'i'a e le Perofeta o Sakaria. (*Sakaria 9:9; Ia matua fiafia o oe le tama fafine a Siona; ia alalaga fiafia o oe le tama fafine a Ierusalem; fa'auta, o le a alu atu lou Tupu ia te oe; o ia o le amiotonu ma le fa'aola; e agamalu o ia, o lo'o ti'eti'e i le Asini, o le tama'i Asini foi.*)

O le malaga a Iesu i Ierusalem, na fa'a'iloa ai o ia o le Tupu ma le Alii o le filemu, e pei ona pepese ma alalaga tagata "Osana".

O le malaga fa'a-tupu foi lea a Iesu, o le amataga foi lea o lona aga atu i puapuaga o lo'o lumana'i e ala i le satauro. O le Aso Sa Laupama, o le aso e fa'amanatu ai le malaga fa'a-tupu o Iesu, e ese mai i le tele o tupu o le lalolagi. O le tupu o lo'o ti'eti'e i le manu o le Asini. O uiga o leni manu o le asini, e agamalu toe filemu. A o le finagalo foi lea o le Atua na auina mai ai Iesu, ina ia maua e le lalolagi le filemu ma le loto maua.

O tagata ia na o latou fola le ala i laupama ma o latou ofu, ua pepese foi ma alalaga "Osana! Ia manuia le afio mai i le suafa o le Alii". O tagata uma nei na o latou molimauina le galuega fa'aola a Iesu na faia mo latou. O le ala foi lea ua latou alalaga ai ma o latou loto talitonu ia Iesu. A'o le au Iutaia lava ia, o tagata ia o lo'o latou fa'atali i se tupu e sau ma le malosi e fa'ato'ilalo ai le malo o Roma, o loo pule sauā ia i latou i lea vaiata. Peita'i, e le o le finagalo lea o le Atua. O le o'o mai o Iesu i le lalolagi, na te talepeina pa vaeloto o le faitaga'i, ae ia maua le loto fa'amagalo ma le fealofani o le fanau a le Atua.

GALUEGA FAATINO: Faatino le tala...

Ua masani le tele o Aoga Aso Sa i tausaga ta'itasi, i le faatinoina o le tala i e uiga i leni aso. E fa'aigoaina leni aso Sa o le "Aso Sa o le Laupama". O nisi foi ua fa'aigoa leni Aso Sa, o le aso o le malaga faatupu a Iesu i Ierusalem. E mafai ona faatino leni tala e le vasega, pe faatino faatasi uma ma isi vasega.

PESE: Osana pepese....
Osana pepese tamaiti uma, tamaiti uma, tamaiti uma.
Osana pepese tamaiti uma, ua afio mai Iesu.
Ua latou fola laupama i le ala, laupama i le ala, laupama i le ala
Ua latou fola laupama i le ala, ua afio mai Iesu.

Ua ti'eti'e atu i Ierusalemā, i Ierusalemā, i
Ierusalemā
Ua ti'eti'e atu Ierusalemā, i luga o le asini.

A'OA'OGA:

1. Ua afio mai le Alii e fa'aola i tatou uma.
2. Ia tau fai lagona faatasi le tāua o Ienei Aso Sa.

.....

ASO SA: 31 MATI 2024 ((Aso Sa Toetu))

MATAUPU: E LĒ O IINEI O IA

SINI: Ia malamalama le vasega, e lē o toe i ai Iesu i le tuugamau, au toetu manumalo.

TUSI FAITAU: Mataio 28:1 – 10

FESOASOANI MO FAIAOGA:

E i ai le talitouga, ua nofo silafia e le to'atele o susuga i faiaoga, le i ai o nai ese'esega i fa'amatalaga ma fa'amaumauga a le au fai-Evagelia e uiga i tinā na ala usu e asi le tu'ugamau. O le mataupu o Ienei aso Sa, o le a tulimata'ia le fa'amatalaina e Mataio o tinā na usu i le tu'ugamau, ina ia maua ai se feau mo tatou. O Mataio lava ia, e to'aluā tinā na o e asi le tu'ugamau, o Maria le makatala ma le isi Maria. O lo'o ta'ua foi e Mataio na fetai'ia i Iesu ma nei tinā, na o la'ua fetagofi foi i vae o Iesu ma ifo ia te Ia.

O le lūlū o le mafui'e ina ua alu ifo le agelu a le Alii mai le lagi, o le fa'ailoga manino lena o le mamalu ma le silisiliese o le Atua ua fa'aalia e lona Alo o Iesu i le lalolagi. O le pupula malosi mai o le sinasina o ofu o le agelu, o le pupula mai foi lena o le malamalama o le Tala Lelei i tinā na o e asi le

tu'ugamau. O le fefefe na o'o i tinā, ua la lagonaina le pa'i mai o le Agaga o le Atua ia i la'ua aemaise o le ola fou e ala i le Toetu mai o Iesu.

O le o a Tina e asi le tu'ugamau, na la molimauina ai ua le o i ai le tino oti o Iesu ae ua Toetu mai, o le ata lena ua fa'ato'ilaloina e Iesu lagona o le oti, ae ua aumai le lagona o le fiafia ma le olioli, ae na amata mea ai tinā. O Iesu o lo'o soifua pea ma ola fa'atasi ma o tatou tagata, ma o lo'o fa'aauau pea e o'o mai lava i o tatou foi tagata. Ia tumau lo tatou talitonu ma fa'atuatua i le Keriso Toetu, e maua ai lo tatou loto tetele e galulue mo Ia ma lona finagalo ma ia tatou maua le fa'aolataga ua Ia saunia.

GALUEGA FAATINO: FAATINO LE TALA

Ia fai sina fa'atinoga pu'upu'u o le tala o le Toetu e tusa ai ma le tusi faitau ma fa'amaumauga a Mataio, ina ia maua ai pea le agaga ma le taua o le Aso Sa o le Eseta.

PESE: Le taeao segisegi i le vaveao e le'i malamalama
Le tala lelei mo oe, le tala lelei mo a'u.
O ulua'i Misionare na tala'iina o tinā
Le tala lelei mo oe, le tala lelei mo a'u
Ua faatauina mea manogi e asi ai le tuugamau
Le tala lelei mo oe, le tala lelei mo a'u
Ua logo mai le tala ua toe soifua le Alii

Tali: Ua iloa le tuugamau ua avanoa
E lē o i ai toe o ie na la'ei ai
E lē o iinei o Ia ae ua toe soifua mai
Le tala lelei mo oe, le tala lelei mo a'u

A'OA'OGA:

1. Ia manumalo pea Keriso i o tatou loto.
2. Fiafia e molimau atu pea i le Toetu o Iesu.

MANATU TA'IALA O APERILA:

O LE ATUA E AUAI MAI.

E tele lava ina lē manatua e fanau, le auai o le Atua i o latou ola i taimi ma aso uma. O le ala foi lea e mafuli ai i le afaina lo latou ola i faigata o le olaga, ona o le galo, o le manatu māmā ma lē fa'atāuaina i le loto ma le mafaufau le a'oa'oga, o le “Atua e auai mai” i so o se taimi ma so o se nofoaga.

ASO SA: 07 APERILA 2024

MATAUPU: O LE MANUMALO MAI LE TUMUTUMU MAUGA

SINI: Ia malamalama le vasega, o le manumalo o Isaraelu, ona o le faatinoga sa faia i le tumutumu mauga.

TUSI FAITAU: Esoto 17: 8 – 16

FESOASOANI MO FAIAOGA:

O le talitonuga o le au Eperu poo tagata Isaraelu, e taua la latou vaai i le mauga, mo le fesoasoani ma se lavea'ina pe a oo ina feagai ma faigata. O la latou talitonuga, fai mai o le mauga, o le nofoaga e afio tumau ai lo latou Atua. O le tatou mataupu, o le tala i le taua a Isaraelu ma Amaleka. Fai mai na fa'atonuina e Mose Iosua ina ia filifili ni tagata o le nu'u latou te sauni e tau le taua ma Amaleka. A'o ia o le a alu e tu i le tumutumu o le mauga ma le to'oto'o o le Atua i lona lima. Ona faia lea e Iosua e pei ona fa'atonuina ai o ia e Mose, ae ua o a'e Mose, Arona ma Huro i le tumutumu mauga. O le tu'utu'uga na fai, afai ae si'i pea i luga le lima o Mose o lona uiga e manumalo Isaraelu, ae afai e tu'u i lalo lima o Mose ona manumalo lea o Amaleka.

O le galuega a Arona ma Huro sa fai, o le taumafai lea e taofi lima o Mose ina ia tumau pea ona si'i i luga ne'i pau i lalo. E lē faigofie foi le galuega na feagai ma Arona ma Huro, auā a fua i le taimi na fai ai le taua, o le aso atoa. E lē taumate na lagona le vaivai, ae sa maua lava le onosa'i ona sa fa'alagolago i le Atua le la galuega sa fai. O le aga'i o Mose, Arona ma Huro i luga o le mauga, o le ata ua tu'u atu lo latou fa'amoemoe i le Atua e fesoasoani mai ina ia a'e manuia le taua o feagai ma Iosua ma le nu'u. O le fa'alagolago i le Atua e fesoasoani mai, e o fa'atasi ma le galulue fa'atasi e fa'atino le galuega ma le loto onosa'i. O le onosa'i ma le galulue fa'atasi o Mose, Arona ma Huro ma lo latou talitonu i le fesoasoani mai a lo latou Atua. O lea na maua ai le manumalo o Isaraelu i le taua ma Amaleka.

O se a'oa'oga tāua mai le tala o lenei aso Sa, ia tatou ola fa'alagolago i le Atua e manuia ai o tatou fa'amoemoega uma. O upu a le fai-Salamo, “*E fa'asaga a'e o'u mata i mauga, e o'o mai ai lo'u fesoasoani. O lo'u fesoasoani e mai le Alii lea, o le na faia le lagi ma le lalolagi*”. O lona uiga, o le Atua lava e maua ai lo tatou manumalo, pe afai e moni ma fa'amaoni lo tatou ola saili atu ia te Ia. O le taimi lava e galo ai ia i tatou le Atua, ae fai o tatou loto, o le taimi foi lea tatou te faiaina ai, ae tuuina atu le manumalo i le tiapolo.

GALUEGA FAATINO: Faatumu avanoa.

Fa'auma fuaiupu ia o lo'o i totonu o le tusi faitau.

1. Ona o mai lea o Amaleka (fuaiupu 8)
_____.
2. Ona fa'atu ai lea e Mose le fata faitaulaga, (fuaiupu 15)_____.
3. _____(fuaiupu 13) ma ona tagata e Iosua i le pelu.

PESE: A'ea'e i luga o mauga.

A'OA'OGA:

1. O le fa'alagolago i le Atua e maua ai lo tatou manumalo.
2. Ia tatou maua le galulue fa'atasi e manumalo ai.
3. A au le Atua ma i tatou, e manuia o tatou olaga.

.....

ASO SA: 14 APERILA 2024

MATAUPU: UA FAASESĒINA I LE FIA ATUA

SINI: Ia malamalama le vasega, o le fia atua tele o le tagata, na mafua ai ona fa'asesēina, ma i'u i le faiaina.

TUSI FAITAU: Kenese 3:1 – 6

FESOASOANI MO FAIAOGA:

O le mea ua matauina, e mafuli le vaivaiga o le tagata i le mana'o tele ma le fia sili. O loo molimauina ia vaivaiga i le tele o tala i totonu o le Tusi Paia atoa. Peita'i, o le mataupu o lenei aso Sa, ua manatu ai i ia vaivaiga na ulua'i mapuna a'e, i le ulua'i tala o le Tusi Paia. O nisi o mafaufauga ma talitonuga fa'apea, a'o galue le Atua i le faiga o le tagata, a'o le taimi foi lea o lo'o matamata lelei ane lava i ai le fili e to'atasi o le Atua ma mea lelei uma. Ua ta'ua lenei fili o le Atua i le tusi o Kenese, o le gata, ua fa'aigoaina foi i le igoa o satani (*o lona uiga – o le ita mai*), ma le tiapolo (*o lona uiga – o le tu'ua'ifuaina*). Fai mai le tala ua fa'alatalata ane le gata i le fafine ma fesili atu i ai, "*E moni ea na fetalai atu le Atua, lua*

te le a'ai i la'au uma o le fa'atoaga? O le natura o Satani, e fa'aaogaina se mea ua filemu ma lelei, ina ia faavevesi ma faaleaga.

Ona tali ane lea o le fafine, *o la'au uma o le fa'atoaga ma te a'ai ai lava, a'o le la'au e tasi ua fa'asa aua ne'i ma a'ai pe pa'i atu i ai, o le la'au e iloa ai le lelei ma le leaga. Auā o le aso ma te a'ai ai pe papa'i foi i ai, o le a ma oti ai*".

O le tali atu a Satani (gata), "*lua te le oti lava, aua ua silafia e le Atua, o le aso lava lua te a'ai ai i le fua o le la'au, o le a pupula ai o oulua mata (1), o le a avea oulua e pei o ni atua (2), o le a iloa le lelei ma le leaga (3)*". E tolu lava mafuaaga tetele o loo tuuina atu i le fa'aosoosoga, e tusa o le tali atu a Satani. Peita'i, a faatulaga ia mafuaaga, o le lona lua e silisili ona malosi. O le mafuaaga, o le avea ma atua, o le avea foi lea ma pule, avea ma faatumutumuga, avea ma nisi e i ai ni malosiaga faapitoa (super power). Ma e talitonu o tatou lagona, o le mafuaaga tonu lava lea na manumalo ai Satani i le ulua'i tagata e ala i le fa'aosoosoga. Ua fia atua le tagata. Ua fa'asesēina le tagata, ina ua fia atua ma fia sili sili atu nai lō lē na faia mea uma lava, o le Atua lea.

GALUEGA FAATINO: FA'AFETAUIGA (Matching)

Fa'afeso'ota'i upu o lo'o i le lisi A, i o latou uiga sao i le lisi E.

A. Lisi o Upu

1. gata
2. satani
3. tiapolo
4. Etena
5. Atamu
6. Eva

E. O uiga o upu

- (a). O le fiafia
- (e). O le fili o le Atua
- (i). O le ola
- (o). O le 'ele'ele
- (u). O le ita mai
- (f). O le tu'ua'ifuaina

TALI. (1=e),(2=u),(3=f),(4=a),(5=o),(6=i)

PESE: Iesu le uo a tamaiti.

A’OA’OGA:

1. Aua le fia sili atu i lo lē na faia i tatou.
2. E leaga le ola tau fa’aosooso.

.....

ASO SA: 21 APERILA 2024.

MATAUPU: O MEAAI NA SAUNIA E LE ATUA.

SINI: Ia malamalama le vasega, o le Atua lava na te tapenaina meaaai mo ona tagata.

TUSI FAITAU: I Tupu 17: 1-7

FESOASOANI MO FAIAOGA:

O lo o faigofie lava ona tatou iloa, mea o loo maua mai ai a tatou mea’ai i aso ta’itasi. O i tatou foi le fanau, o loo faamoemoe lava i o tatou matua i mea’ai tatou te aai ai.

O le mea ia manino ma iloa tamaiti, o mea’ai uma tatou te aai ai, o meaalofa uma e foa’i mai e le Atua mo tatou. O le tala i lenei aso Sa, o le tala ia Elia ma meaaai na ai ai. O Elia, o le Perofeta a le Atua i le taimi a’o avea A’apo ma tupu o Isaraelu. O le tupu lenei ma lona to’alua o Iesepela, na ta’ita’i seseina ai le nuu o le Atua ma ua tapua’i ai i le atua o Saitonu. O Pa’ala o se fa’atagata na faia e tapua’i i ai Isaraelu. O le agasala lea na mafua ai ona oge le nu’u. Ua leai se suavai, ua lē tafe vaitafe auā ua taofia e le Atua le timu, ona ua tapua’i ia Pa’ala. O le finagalo o le Atua, o le a oge ma lē toe i ai se timu. Na logoina e le Atua lana auauna o Elia, ma ua ta’u atu foi e Elia i le nu’u. O le mafuaaga lea na matua o’o ai le ita ia A’apo le tupu ia

Elia, ma ua ia fia fasioti foi ia Elia. Na silafia e le Atua lea mea, ona ia vala’au ai lea ia Elia ina ia tu’ua le nu’u ae alu i le alia i Kirita ma lafi ai. Ma ua na o le pau lava lea o le vai o lo’o i ai sina vai e inu ai.

Na usita’i Elia ma alu loa ma lafi i le alia. O i’ina o le a fafaga ai e oreva i a’ano o manu fasi, ma areto, e inu foi o ia i suavai o le alia o Kirita. Na faia lava e Elia e pei ona faatonuina ai, ma ua nofo ai na o ia, faapei o se tagata ua leai sona fa’amoemoe. Peita’i, na silasila pea fofoga alofa o le Atua i lana auauna o Elia ma tausi ia te ia.

O tapenaga a le Atua na fai mo lana auauna, na Ia fa’aaogaina ai oreva, e auina atu meaaai, e fafaga ai lana auauna. Ua na o le o lava o oreva ma o mai ma a’ano o manu ma tu’u ia Elia, ma fa’asaga atu Elia ua fai ai lana mea’ai.

Tamaiti, o ai na fafaga ia Elia? Ioe, o le Atua. O meaaai na saunia, na fa’aaogaina ai e le Atua lana foafoaga pei o manu e na te ‘aumai mea’ai mo Elia. Tamaiti, e fa’apena tatou, e mafai ona fafaga tatou e le Atua, ae auala ese’ese mai lona finagalo. Tatou te le o fia a’ai ma su’e mea’ai solo i totonu lava o si o tatou atunu’u. O le fa’ailoga lena o lo’o saunia pea e Atua meaaai i so o se ala, e fafagaina ai i tatou pe a tatou fia aai.

GALUEGA FA’ATINO: ATA FA’AMATALA.

Tusi mai se parakalafa e fa’amatalaina ai le ata ua tuuina atu. O mea tāua lava ina ia manino, o le nofoaga, o le igoa o le tagata, o igoa o manulele o lo o i le ata.



PESE: Faalogo ma usita'i.

A'OA'OGA:

1. O le Atua lava e tausia i tatou uma lava.
2. Aua le popole i soo se mea, o loo soifua le Atua.
3. E malaia pe a ifo i tupua.

.....

ASO SA: 28 APERILA 2024

MATAUPU: E LĒ FAAILOGA TAGATA IESU

SINI: Ia malamalama le vasega, o le Tala Lelei ia Iesu Keriso, e mo tagata uma, ae lē na o se vaega o tagata.

TUSI FAITAU: Kalatia 3: 23 – 29

FESOASOANI MO FAIAOGA:

E le fou le ola fevaevaea'i ma le fefulituaa'i o le lalolagi, e afua mai i le fa'asili pule ma le fe'ese'esea'i o manatu ma lagona o tagata, aemaise foi o talitonuga o tagata i a latou talitonuga. E le i faigofie le galuega tala'i a le Aposetolo o Paulo ona o le tele o le mau tala'iga ese'ese sa i ai i lona vaitau. E ui i ia fa'afitauli na tutupu, ae ua lava tapena le Aposetolo mo taimi fa'apenei, ma ua maa'a lona fa'atuatua e ala i le mafutaina e le Agaga Paia o le Atua.

O le tusi ia Kalatia, o le tusi o le sa'olotoga. O le manatu o le Aposetolo o lo o fa'apea atu ia Kalatia, o le Toetu o Keriso ua fa'asa'olotoina mai ai outou mai le amo o le pologa. *“Auā o outou uma lava na papatisoina ia Keriso, ua outou o'ofu ia Keriso; e le o i ai se Iutaia po o se Eleni, e le o i ai se pologa po o se sa'oloto, e le o i ai se tane po o se fafine; aua ua tasi lava outou uma ia Keriso Iesu.”*

O le mataupu lea o lo o fa'aalia ai le lē fiafia o Paulo ia Kalatia, ona ua uma ona a'oa'oina i latou i le Tala Lelei e ala i le Keriso Toetu, a'o lea lava e fa'aluafesasi o latou mafaufau ma se'etia gofie lo latou fa'atuatua. O le uiga la o le manatu o le Aposetolo, e lē tatau ona latou toe foi i le amo o le pologa. Auā sa fai ma o latou ta'ita'itama le tulafono, peita'i o le maliu ma le toetu o Keriso i le manatu o Paulo, ua suia ai mea uma e ala i le alofa tunoa o le Atua, ua tino mai ia Iesu, ma ua ta'uamionuina ai le tagata ona o le amiotonu a Iesu Keriso. Tamaiti, o le maliu ma le Toetu o loo tatou Alii o Iesu Keriso, ua tasi uma ai i tatou e ala i le fa'atuatua fa'amaoni. O lona uiga, po o a lava o tatou fe'ese'esea'iga i o tatou talitonuga fa'a-le-tagata, ia tatou iloa ma mautinoa, e tasi uma lava tatou ia Keriso. O lona finagalo, ia tatou maua le loto maulalo ma le loto fa'amagalo, ia tatou maua le loto maulalo ma le loto fa'amagalo, ia tatou maua le loto maulalo ma le loto fa'amagalo, ia nonofo fealofani ma fetausia'i, ae fusia mea uma i le alofa, auā o le finagalo lena o le Atua mo tatou uma.

Uiga o upu:

- i) fa'atuatua - fa'alagolago ma fa'amoemoe i mea e le vaaia e mata
- ii) fa'aluafesasi - le mautonu po'o le masalosalo
- iii) ta'uamiotonu - o le ave ma tagata ua tonu le amio
- iv) ta'ita'itama - ta'iala

GALUEGA FAATINO: Tusiga Tusi

O oe o Paulo le Aposetolo. Tusi sau tusi e ave i lou aiga o loo i Kalatia, e fautua ai i le tulaga o fa'afeagai ma i latou, ina ua latou tia'i le Tala Lelei, ae ua toe fo'i i amioga tuai na ola muamua ai. E lē gata i lea, o le tulaga i le fe'seesea'i ona o le manatu faapito ma le faitaga'i i le va o Kerisiano Eleni (nuu ese) ma Kerisiano Iutaia. Toe faamanatu i ai, o le maliu o Keriso, e mo tagata uma.

PESE: A tumau ia Iesu..

A'OA'OGA:

- 1. Ia loto gatasi ma le fealofani.
- 2. O le loto maulalo ma ola fa'amagalo, o le mea sili lea.
- 3. O Keriso mo tagata uma.

.....

MANATU TA'IALA O ME: O LE ATUA FA'AOLA.

O le Atua ma lona alofa, e auga lava i le fa'aolaina o le tagata, i le tino, mafaufau ma le Agaga. O le finagalo lava o le Atua, ina ia fa'aola le tagata atoa, auā le faatinoina o lona finagalo i le lalolagi. E tatau ona manatua e fanau, e lē finagalo le Atua e aveese le tagata, ae nauanau e fa'aola.

ME: O LE ATUA FAAOLA

ASO SA: 5 ME 2024

MATAUPU: O LE FAAOSOOSAINA O IESU

SINI: Ia malamalama tamaiti o Iesu o le Alii Manumalo

TUSI FAITAU: Mataio 4: 1 – 11

FESOASOANI MO FAIAOGA:

E fa'atalofa atu ia te outou le fanau i lenei taeao fou. Tatou faafetai i le Atua ua tatou aulia manuia mai lenei Aso Sa muamua o le masina lona 5 o lenei tausaga.

O le tatou mataupu o lenei taeao e faapea: O LE FAAOSOOSAINA O IESU. O ai se tama po o se teine e mafai ona ia ta'u mai, e faafia ona faaosoosoina e le tiapolo Iesu? Lelei, manaia. Ioe e faatolu (3) lava ona faaosoosoina e le tiapolo lo tatou Alii o Iesu. O le upu faaosoosoina pei ona taua i le tatou mataupu, e sau mai le upu faaoso, e uiga tutusa ma le upu tauanau.

Ua ave e le agaga Iesu i le vao ina ia faaosoosoina ai. Manatua foi e fa'atolu lava ona faaosoosoina e le tiapolo Iesu. Fai mai le tala a le Evagelia a Mataio, ua faalaina o ia i po e fagafulu ma ao e fagafulu. Mo lona uiga e le'i ai pe inu foi, mulimuli ane ona fia taumafai ai lea o Iesu. Ua alu ane ia te ia le tiapolo ma faapea atu, "Afai o oe o le Alo o le Atua, Fetalai atu ia, ia liu areto nei ma'a". Ae tali atu Iesu i le tiapolo, "***E le na o mea e ai e ola ai le tagata. A'o afioga uma ua tulei mai i le fofoga o le Atua***".

Ua toe ave foi e le tiapolo Iesu i le aai paia, ua ia fa'atu foi ia te Ia i le tumutumu o le malumalu ona toe faaosoosoina foi ma fai atu. "Afai o oe o le Alo o le Atua, oso ia oe i lalo, auā ua tusia,

E poloai o ia i ana agelu ia te oe, latou te ave ia te oe i o latou lima nei tuiua lou vae i se ma'a. A ua fetalai atu Iesu ia te ia, "Aua e te tofotofo i le Alii lou Atua". E lē mafai e le tiapolo i lona fia faaososo. Ua ia toe ave ia te ia te ia i le mauga maualuga lava. Ua ia fa'aali ia te ia malo uma o le lalolagi ma o latou matagofie, ma ia fai atu, "Ou te avatua nei mea uma ia te oe, pe a e faapaū ma ifo mai ia te a'u".

A ua fetalai atu Iesu, "Ina alu ese ia oe Satani. Auā ua tusia – E te ifo atu i le Alii lou Atua na o Ia lava e te auuuna i ai". Ua manumalo Iesu mai ona fa'aosoosoga. Tamaiti ia a'oa'o mai lenei tala mo tatou. Aua nei manumalo ni faaososoga ia i tatou, po o sē na te tauanauina i tatou e fai se mea leaga.

GALUEGA FAATINO:

Faauma fuaiupu nei:-

1. E le na'o meaai _____ a o Afioga uma e tulei mai i le _____.
2. Aua e te tofotofo i le _____
3. E te ifo atu i le _____ ua na o Ia lava _____.

PESE: O Iesu o ia o le manumalo.

A'OA'OGA:

1. O Iesu o le Alii manumalo.
2. Tatou te faamoemoe i le Atua i mea uma, tatou te faia.
3. E le na'o meaai e ola ai le tagata.

.....

ASO SA: 12 ME 2024

**MATAUPU: O LE TATALO A HANA
(Aso Sa o Tinā)**

SINI: Ia malamalama le vasega o le tatalo, ua tatou feso'ota'i ai ma le Atua.

TUSI FAITAU: 1 Samuelu 1: 10 – 18

FESOASOANI MO FAIAOGA:

O Hana o le tinā tatalo. Sa fai Hana ma avā a le tamaloa e igoa Elekana. O le toeaina lea e toalua ana avā, o le fafine e igoa ia Penina, ma le tinā lea o Hana o lo o autu i ai le tatou mataupu.

Fai mai le tala sa tatou faitau i ai, o Penina e fanau a'o Hana e pa e leai sana tama. O le ala lea o le tulivae o Hana i le Atua i le tatalo, ina ia foai se tama mo ia. Vaai la tatou tamaiti i le mana o le tatalo, o le tagata ua tatalo ma le faamaoni ma le loto faatuatua. Ua aioi i le Atua ma le loto maualalo, ma tu'u atu i le Alii lona mana'o.

O upu a le tatalo a Hana o lo o i le fuaiupu e 11 o le tusi sa tatou faitau. E ese ona tatalo, e fia maua sana tama, a'o lea foi e manao e toe foai le ola o lana tama mo le Alii. Ua vaai mai le toeaina o Eli iā Hana, ua na ona memu o ona gutu ua le lagona sona leo. Ona fai atu lea o Eli ia te ia, "E te onā seia afea." Ae fai mai Hana "O a'u o le fafine ua tiga le loto, ou te lei inu i se uaina, a ua momoli atu lou loto i le Alii. Ua faamanuia atu foi Eli ia te ia ma faapea atu - Ia foai atu e le Atua ia te oe le mea na e faatoga atu ai ia te ia.

Tamaiti, e ese le manaia o lenei tala ua a'oa'o mai mo i tatou. Ia e tatalo i le Atua ma lou loto atoa ma le faamaoni, aioi i le Atua e foai mai le poto e faatino ai au meaaoga. Ia tatou toaaga e tatalo i le Alii.

GALUEGA FAATINO: Tusiga Tatalo.

Tusi mai sau tatalo o lo o fia fai mo se mea o lo o e mana’o i ai. Fa’ailoa i fanau vaega o le tatalo. (Faafetai, Faatoesega, Mana’oga). A mae’a, ona faasolo lea e faitau mai le tatalo i luma o le vasega.

PESE: Fai sau tatalo i le taeao.

A’OA’OGA:

1. E mana le tatalo.
2. Tatalo ma le loto faamaoni.
3. O le tatalo o le auala lea tatou te fesootai ai ma le Atua.

.....

ASO SA: 26 ME 2024

MATAUPU: IA LOTO FA’AMAGALO

SINI: Ia malamalama tamaiti, o le loto faamagalo o Iosefa ua manuia ai Isaraelu i Aikupito.

TUSI FAITAU: Kenese 45: 1 – 8

FESOASOANI MO FAIAOGA:

O Iosefa o le atalii o Iakopo. O le tama nei sa amio leaga i ai ona uso matutua. Sa latou fasi, ma lafo ia te ia i le lua. Ua o ane tagata Mitiana ma ava’e ia te ia i le lua ma faatau atu i tagata Sā-Isamaelī i tupe e luafulu, ma latou avatu ia te ia i Aikupito. O i tonu lava na mafua ai ona o’o Iosefa i Aikupito.

Ese le leaga o lenei mea ua faia e nei tama i lo latou uso o Iosefa. Ua latou pelogia foi lo latou tama ua oti Iosefa.

Ina ua oge Isaraelu, ona auina atu lea e Iakopo o lana fanau e o atu i Aikupito e saili mai ni meaai mo i latou. Ae manatua foi tamaiti o Aikupito lea ua i ai Iosefa. E le faigofie foi le olaga sa feagai ai ma Iosefa i Aikupito.


Peitai, e le’i mafai e ia faafitauli ona aveese le ola faamaoni o Iosefa. Mafua ona o le tagata e talitonu ma faatuatua faamaoni i le Atua, lea lava na iu i le faaeaina. O le taunuu o ona uso i Aikupito, o ala lava na tapena e le Atua, lea e tautino e Iosefa, “Na auina mai foi a’u e le Atua, e muamua ia te outou, e faasaoina outou i le lalolagi, e faaola foi ia te outou i le faaolataga tele. O lenei e le o outou ua auina mai a’u, a o le Atua”.

Tamaiti, o le loloto lena o le loto faamagalo o Iosefa i ona uso. Ua lē faitauina e Iosefa leaga o ona uso, ae ua ia faapea ane. Na auina mai a’u e le Atua e muamua e faasaoina outou i le lalolagi.

Ia faapena foi tatou le fanau, ia tatou maua le loto faamagalo, ia avea i tatou ma faamanuiaga i isi tagata, o lo o moomia le fesoasoani. Ia manuia tele outou le fanau.

GALUEGA FAATINO:

Faafetaui upu i o latou uiga fa’aaoga i ai le Tusi Paia.



PESE: Pese ma Viiga 136

A’OA’OGA:

1. Ia tatou maua le loto faamagalalo.
2. E fa’aeaina le tagata loto faamagalalo.
3. Ia fai i tatou ma faamanuiaga i isi.

.....

MANATU TAIALA O IUNI: IA FAAMOEMOE I LE ALII

Ua to’atele tagata ua o latou faamoemoe i mea ua i o latou lima, o le malosi ua maua, ma se potou ua i ai. Ua galo ai le fa’amoemoe i le Alii, o lē e ana le malosi uma lava, o le potou ma le mafaufau, aemaise o lē e pule i mea uma lava. Ua lu’itauina i tatou i lenei masina, ina ia taumafai e fa’amoemoe tasi i le Alii i so o se mea o le ola.

ASO SA: 02 IUNI 2024

MATAUPU: O LE MANUMALO O TAVITA IA KOLIATA

SINI: Ia malamalama le vasega, o le manumalo o Tavita, ona sa fa’alagolago i le Atua.

TUSI FAITAU: 1 Samuelu 17: 44 – 50

FESOASOANI MO FAIAOGA:

O Tavita o le atalii o Iese, o le ui’i foi o le fanauga. O ia foi sa leoleo i le lafu mamoe a lona tamā i le nuu o Peteleema.

O Koliata o le toa ta’uta’ua o Filisita, o se tagata malosi, e leai se tagata e fia soso i ai, auā e matautia ma malosi lenei tagata. Fai mai e vaaia loa e tagata Isaraelu le toa malosi lenei o

Koliata, sosola loa auā ua matuā popole ma fefefe lava. Manatua foi o Tavita o le leoleo mamoe, ae sa ia faaumatia pe fasia le leona ma le urosa, sa i le lafu mamoe a lona tamā. Sa faamoemoe Tavita i le Atua i mea uma na ia faia. O le Atua foi na lavea’i ia te ia. Ua tonu foi ia Tavita o le a ia alu e tau ma lena Filisitia.

O le alu a Tavita e le o alu i sona malosi, ae o lo o alu ma le faamoemoe i le Atua soifua. Ua iloa mai e le Filisitia Tavita ona matua inoino ai lea o ia ia te ia. Ua ia valaau mai ia Tavita “Ou te se ulī ea a’u, ina ua e sau ia te a’u ma to’oto’o? Ia sau ia te a’u, ou te foai atu lou tino i manu felelei ma manu tata’a”. Ae tali mai Tavita i lenei tagata malosi ma le maualuga. *“Ua e sau ia te a’u ma le pelu, ma le tao ma le tao leoleo, ae ou te alu atu ia te oe i le suafa o le Alii o au”*.

O le Atua o le itu taua a Isaraelu, ua e faifai i ai. Ua tago Tavita i le ato, ua ave ifo le ma’a ta, ma sasau e ia, ua lavea le Filisitia, ua goto le ma’a ta i lona muaulu ua pa’ū i le elele, ua oti ai.

Ioe le fanau, aua tatou te faamoemoe i lo tatou malosi. Aua foi tatou te fia malosi. Tatou te faamoemoe lava i le Atua na te foai mai lava le malosi mo i tatou e faatino ai a tatou feau ma galuega.

GALUEGA FAATINO: Tusiga solo

Tusi sau solo e faatatau i le tatou autu: O le manumalo o Tavita ia Koliata. Lua fuaiupu ae tai fa laina.

PESE: Na o si tama o Tavita

A’OA’OGA:

1. Aua e te fa’amauualuga.
2. E au le Atua ma i tatou.
3. O le Atua o le malosi lava ia.

ASO SA: 09 IUNI 2024

MATAUPU: UA FAAMALOSI IOSUA MA KALEPO I LE NUU

SINI: Ia malamalama le vasega e leai se mea e faigata i le Alii.

TUSI FAITAU: Numera 14: 1 – 10

FESOASOANI MO FAIAOGA:

O lea ua taunuu le malaga a Isaraelu i le vao o Kanana i Katesa. Ui mai i le sami ulaula, faataamilo i le vao i tausaga e 40, ae sa i ai lava le Atua i lona nuu.

I le mataupu e 13 o le tusi o Numera, o lo o taua ai tagata na o ē asiasi i le nuu o Kanana pei ona poloai mai ai le Atua iā Mose. O i latou o matai uma o le fanauga a Isaraelu ma tagata ia e toalua o Iosua ma Kalepo. O Iosua o le atalii o Nuno, ma Kalepo o le atalii o Iefune. O matai la ia sa o faatasi ma tama ia e toalua, o i latou la sa aumaia le tala e faavaivaia ai loto Isaraelu. Fai mai latou, e moni o le nuu o lo o tafe ai le suasusu ma le meli, ae peitai, o lo o nonofo ai tagata malolosi ma le tino ese. Ae na finau lava Kalepo ma fai atu, se tatou te manumalo lava i ai, ae ua lē mafai lava i latou na o e asiasi. Ua faavaivai ma fai mai, latou te lē mafai ona o tagata malolosi o lo o nonofo ai.

Ua alalaga le nuu ma muimui ia Mose ma Arona ma faapea ane, Ana matou oti lava i Aikupito o lelei. Ua faalologo Iosua ma Kalepo i le lē fiafia o le nuu. Ua la saei i o la ofu, ua fai atu i le fanauga a Isaraelu. O le nuu na matou asiasi atu i ai ua matua lelei lava mo i tatou. O le nuu o lo o tafe ai le suasusu ma le meli.

Manaia le faamalosi a Iosua ma Kalepo a tamaiti, faamalolosi le nuu auā o lo o au le Atua ma i latou. Finau ma faamalosi e fai au meaaoga e maua ai lou lumanai manuia.

GALUEGA FAATINO:

1. O ai le tagata o lo o autu i ai le tatou mataupu?
2. O le a se galuega sa fai e tama ia mo Isaraelu?
3. Aisea e le fia o ai Isaraelu i Kanana?

PESE: Pese ma Viiga 175

A’OA’OGA:

1. O Iesu o le faamalosi au sili.
2. Faamalosi ma finau i mea sili.
3. E au le Atua ma i tatou.
.....

ASO SA: 16 IUNI 2024

MATAUPU: UA SAVALI LE PIPILI

SINI: Ia malamalama le vasega o le faatuatua o le pipili na toe savali ai.

TUSI FAITAU: Galuega 3: 1 – 10

FESOASOANI MO FAIAOGA:

Ua savali le pipili. Ou te iloa ua vaai uma tatou i le tagata pipili. Ioe, o le pipili, e le mafai ona savali, leaga ona vae, le mafai ona tu i luga.

A’o alu atu le malaga a Peteru ma Ioane e tatalo i le malumalu, e i ai lava le tagata ua fai ana masani le nofonofu i luma o le faitotoa o le malumalu, e aisi pe faatoga atu i tagata mo se meaalofa mo ia.

Ua iloa mai laua e le pipili, ma ia faatoga atu ia laua mo se meaalofa. Ua pulatoa atu Peteru ia Ioane, ua faapea ane Peteru ia te ia. E leai se ario po o se auro, a o le mea o ia te a’u ou te avatu, O le suafa o Iesu Keriso le Nasareta, ina tulai ia ma savali. Na ona uma lava ona fai atu o Peteru, ua ia faatu ia te ia i luga, Ua oso o ia i luga, ua savali, ua ulu atu foi i le malumalu, ua vivii atu i le Atua.

Ese le matautia o vavega na faia e le Atua. Ua toe savali le pipili. Tatou talitonu ma le faatuatua e leai se mea e faigata i le Atua. Manuia tele outou le fanau.

GALUEGA FAATINO: Faatino le Tala.

Ia faatino e le vasega le tala sa faamatalaina.

PESE: Peteru ma Ioane na malaga

A’OA’OGA:

1. Tatou talitonu ma faatuatua i le Atua.
2. E leai se mea e faigata i le Alii.
3. Vivi’i i le Atua a’o maua le malosi.

.....

ASO SA: 23 IUNI 2024

MATAUPU: O ISARELU MA LE TAMA’I POVI AURO

SINI: Ia malamalama le vasega ua na o le Atua lava tatou te ifo i ai.

TUSI FAITAU: Esoto 32:1 – 6

FESOASOANI MO FAIAOGA:

O lea lava e fa’atamilo le nuu o Isaraelu i le vao. Ua alu a’e Mose i luga o le mauga o Sinai e tusa ma le poloaiga a le Atua. Ua taligā le nuu, ua fiu e faatali Mose. Ua faapotopoto le nuu ma faapea atu ia Arona. Tu ia oe i luga e fai se atua mo i matou. Oka se leaga o nei tagata. Manatua foi sa nofo pologa i Aikupito. O le Atua sa laveai ia te i latou o mai le sami ulaula, taavao i le vao i tausaga e 40, o le Atua lava na taitai ia te i latou. A’o le a le mea ua tupu?

Ua faaoso Arona e fai se atua mo i latou, ma na talia foi e Arona. Ua latou ao i mea auro uma mai i fafine o le nuu ma avatu ia te ia. Ua gaosi pe fau foi e Arona le tamai povi auro ma fai atu ia Isaraelu. O lo tatou atua lena. Oka se leaga o Arona ma tagata o le nuu o Isaraelu. Fai mai foi e a le tulafono muamua (1) Aua nei fai mo oe ni atua ese i ou luma.

Aua lava nei o tatou talitonu i nisi atua ese. Tasi lava le Atua tatou te auauna ma tapuai ai. O le Atua o le na faia i tatou ma laveai i lo tatou ola.

GALUEGA FAATINO

PESE: Pese ma Viiga 256

A’OA’OGA:

1. Aua nei fai mo oe ni atua ese i ou luma.
2. Tatou usita’i i le Atua.
3. O le Atua e toatasi lava Ia.

.....

ASO SA: 30 IUNI 2024

MATAUPU: O LE FAAFITI A PETERU

SINI: Ia malamalama le vasega e silafia e le Atua mea uma.

TUSI FAITAU: Mataio 26: 69 – 75

FESOASOANI MO FAIAOGA:

Talofa tamaiti, malo le soifua manuia. Ua tatou taunuu manuia mai i le Aso Sa mulimuli o lenei masina. O le tatou mataupu e fa'aautu i le so'o e igoa ia Peteru.

Tamaiti o Peteru e taua o le so'o osovale. E taumafai lava Peteru ia muamua i mea uma o le latou mafutaga ma Iesu. Lea foi na oo i le agai atu o Iesu o le a fetaiiai ma ona puapuaga ae tautino Peteru, ua ia sauni e o faatasi ma Iesu, tusa lava pe oo i le oti.

Talofa, manaia ia o le tautinoga a Peteru, peitai na vaai loa Peteru ua amata sauaga o Iesu, fefe loa ma palaai, ua solasola solo ma fai atu i tagata na te le leiloa Iesu. E faatolu ona faafiti Peteru na te lē iloa Iesu. Na salamo Peteru ina ua faalogo i le vivini o moa ma toe manatua ai lana tautinoga sa fai ia Iesu. Ua ia ulufafo ma tagi lotulotu, o le faailoga o le tagata ua ia lagona lona sesē.

Ioe tamaiti, e lē lelei le ta'utino i se faamoemoe ae lē mafai ona faatino auā o lona taunuuga o lou faafiti, pei ona faafiti Peteru. Auā o le faafiti e uiga tutusa ma le upu pepelo.

GALUEGA FAATINO: Faatulagaga

Faatulaga fuaiupu e tusa ma le faasologa sa'o i le Tusi Faitau.

1. Ou te le iloa lava lea tagata.

2. E moni, o oe lava lo latou, aua ua iloa oe i lau gagana.
3. Ona vivini loa lea o moa.
4. Ou te le iloa le mea e te fai mai ai na
5. O oe foi, sa oulua faatasi ma Iesu le Kalilaia.

PESE: Pa'i mai nei le Alii e,
(Touch me Lord one more time)

A'OA'OGA:

1. Ia o faatasi upu ma faatinoga.
2. E silafia e le Atua mea uma.

.....

MANATU TAIALA O IULAI: NA FAIA E LE ATUA MEA UMA

O lo o tatou sapi ma fiafia i lenei lalolagi i mea uma lava. E le gata o lona siosiomaga, i lafanua lanulauava ae o lona gataifale manaia. O ia mea uma, na faia e le Atua mo le manuia ma saoloto tagata uma. Ia iloa foi e tagata le pule aoao a le Atua i mea uma.

ASO SA: 07 IULAI 2024

MATAUPU: UA FAAMĀLŌLŌ E IESU LE LIMA GASE

SINI: Ia malamalama le vasega o Iesu e loto i le alofa ae lē o le tulafono.

TUSI FAITAU: Mareko 3: 1 – 6

FESOASOANI MO FAIAOGA:

O le faamalologa tamaiti, o se tasi o galuega alofa na faia e Iesu. O le faamoemoe o le faamalologa ina ia aveesea tiga o feagai ma le tagata. O le galuega, o le fa’amalologa lea mo le tagata ma’i faapei, o se tauaso ua toe pupula.

O Iesu ma lana galuega fa’aola e mo tagata uma. O lona faamoemoe ia oo le fesoasoani i le o moomia le fesoasoani, peitai ua le mafai le au-tusiupu ma le au Faresaio ona saili i se auala e ta’uleagaina ai le galuega faaola a Iesu. O lea ua ulufale Iesu i le sunako o lo o tumu i le au-tusipu ma le au-faresaio, o e tausi i le tulafono ma a’oa’o tulafono i le lotu, ae lē fiafia iā Iesu. E sili foi ona latou manatu e lē faia ni galuega i le Aso Sa e oo lava i ni fa’amalologa mo e mama’i.

Sa i totonu o le malumalu se tasi tagata e gase lona lima. Ua fetalai atu Iesu – “Ina tulai ma tu mai i totonu” Ou te fesili atu ia te outou pe tatau ea i le sapatu ona agalelei pe agaleaga, po o le faaola po o le fasioti?”

Talofa ua na o le va’ava’ai solo o le motu o tagata ua le mau tali. Ona fetalai atu lea o Iesu i le tagata ma’i “**Ina faaloaloa ia lou lima**” ona toe manuia ai lea o le lima gase. Ua lē fiafia le au a’oa’o tulafono ua na o le talanoa ma muimui ae leai se mea na faia ia Iesu.

GALUEGA FAATINO: Fa’aaliga Manatu

Ia faasoa le vasega e uiga i le autu – **E tatau ea i le sapatu ona agalelei pe agaleaga?**

Ia fa’aaoga pea le mataupu sa faamatala e agai i ai le faasoa.

PESE: O le alofa, le agalelei
O le alofa, le agalelei
E mulimuli mai ia te a’u
I aso uma, i aso uma o lo’u ola. } x2

Tali: Oute nofo i le fale o le Alii i aso uma lava
Ma te talisua foi o Ia ma a’u
O le alofa, le agalelei
E mulimuli mai ia te a’u
I aso uma, i aso uma o lo’u ola.

A’OA’OGA:

- 1. O le alofa e sili i mea uma.
- 2. E pule aoao le Atua.
- 3. O le Atua o le faamalologa sili

.....

ASO SA: 14 IULAI 2024

MATAUPU: UA VAELUAINA LE SAMI ULAULA

SINI: Ia malamalama le vasega o mea uma o le foafoaga e pule aoao ai le Atua.

TUSI FAITAU: Esoto 14: 15 – 22

FESOASOANI MO FAIAOGA:

O le lavea’iina ma le fa’asaolotoina o Isaraelu mai i Aikupito, na molimauina ai le silisili ese o le Atua ona o le tele o vavega aemaise o le faailoa o le pule aoao a le Atua i mea uma.

O le vaeluaina o le sami ulaula, o se tasi o galuega ofoofogia tele. O le popole vale o Isaraelu ina ua luma-fale i le sami-ulaula ae tua-fale i kariota ma le tulituliloa a Farao le tupu lotu māa’a o Aikupito ma lana autau. O inā sa faailoa ai e le Atua lona silisili ese. O le faamoemoe ua maua mai i le ala e lei

mafaufauina e le tagata ae ua tapena mai ai e le Atua le ala e lavea'iina ai Isaraelu.

Ua fetalai mai le Alii ia Mose, “ia e sii i luga lou to’oto’o, ma faaloaloa lou lima i luga o le sami, ma e vaeluaina ai”. Ua faaloaloa e Mose lona llima i luga o le sami, ona faatafeeseina ai lea e le Alii o le sami ma ua savavali Isaraelu i luga o le iliti tai mātūtū.

Ioe tamaiti, o le mata’utia lena o le alofa o le Atua i lona nuu o Isaraelu. O le fa’aalia foi lenā o lana pule aoao i lana foafoaga, ina ua Ia vaeluaina le sami-ulaula, o le galuega e lē mafai ona faia e soo se tagata po se isi lava mea o i le lagi ma le lalolagi.

GALUEGA FAATINO: Tusitusiga

Tusi sau solo i le autu – “**E PULE AOA O LE ATUA.**” Ia 2 fuaiupu tai 4 laina.

PESE: Ou te pese i le matautia

A’OA’OGA:

1. E ofoofogia galuega a le Atua
2. E mafaia e le Atua mea uma
3. E lavea'iina e le Atua i tatou.

.....

ASO SA: 21 IULAI 2024

MATAUPU: UA VAVAO E IESU LE MATAGI MA LE VAI

SINI: Ia malamalama le vasega, o le matagi ma le vai na usitai iā Iesu.

TUSI FAITAU: Mataio 8: 23 – 27

FESOASOANI MO FAIAOGA:

Faatalofa ia te outou le fanau i lenei taeao fou. O le tatou mataupu ua fa’aautu e faapea. “*Ua vavao e Iesu le matagi ma le vai.*” O le upu vavao, e uiga tutusa ma le upu taofi. O lona uiga o le faatinoga o loo atagia i le tatou autu, o lo o manino ai, o lo o i ai se isi malosililo o lo o iā Iesu e afua ai ona usiusitai ia te Ia le matagi ma le vai.

Ioe tamaiti, e le mafai e se malosililo faa-le-tagata ona faia o ia galuega. O le tatou tusi faitau, o lo o molimauina ai le galuega fa’auau a Iesu mo le lavea'iina ma le faamaloloina o tagata. Ua toatele foi ua mulimuli, o isi tagata e moomia le fesoasani ae o isi e taulamalama ma tau-faaleaga.

Ua maliu ae Iesu i le vaa, ua faatasi atu foi ia te Ia o le au soo. Talofa, ua to mai le afā tele i le vaa, ma osofia ai le vaa i peau ae o lo o tofā Iesu. Ua lē mautonu le ausoo ma ua popole vale, ua leai so latou faamoemoe. Ua latou fafagu ia Iesu ma faapea atu – “Alii e, faaola mai, a matou fano.” Ua fetalai atu Iesu ia te i latou “Se a le mea ua outou matata’u ai, ua outou faatuatua ititi.” Ua tulai Iesu ua vavao i le matagi ma le vai, ona tele ai lea o le malū.

Ioe tamaiti, ua usiusitai le matagi ma le vaa, o le motu foi o tagata ua taufaiofo ma tuu fesili po o le a le uiga o lenei tagata. Ae o le silisili ese lea o le Atua o lo o auaua i ai. O Iesu e pule aoao, e leai se mea e faigata ia te Ia. O Ia foi na te laveai ma faaola ia i tatou i taimi e feagai ai i tatou ma faigata.

GALUEGA FAATINO: Tali i le Sao po o le Sese

Fesili:

1. Sa faatasi Iesu ma ona soo i le vaa.

Tali: Sa’o

2. Ua agi le afa tele ona goto ai lea o le vaa.
Tali: Sese
3. “Se a le mea ua outou matata’u ai: o upu ia o le fetalaiga a Iesu.
Tali: Sa’o
4. Ua usiusitai le matagi ma le vai iā Iesu.
Tali: Sa’o

PESE: A i ai Iesu i lou vaa.

A’OA’OGA:

1. E usiusitai mea uma ia Iesu.
2. E silisiliese le Atua.

.....

ASO SA: 28 IULAI 2024

MATAUPU: UA A’OA’OINA NEPUKANESA

SINI: Ia malamalama le vasega na iloa e Nepukanesa le mata’utia o le Atua.

TUSI FAITAU: Tanielu 3: 28 – 30

FESOASOANI MO FAIAOGA:

O Nepukanesa o le tupu o Papelonia. O le tupu na ia pulea le malo o Iuta, o le tupu e faamaualuga i le tamaoiga o lona malo. E le talitonu i le Atua o Isaraelu, ae na ia faia lava i lona poto ma lona atamai se tupua auro ma ua ia faapotopoto tagata uma, faatasi ma lana poloaiga malosi e fa’asala le tagata e le tapuai ma ifo i le tupua auro.

Talofa ua toatele tagata ua usitai ona o le fefefe, auā a le ifo i le tupua, o lona tali o le ogaumu aasa. Peitai e lei avea lea faasalaga ma ala e vaoia ai le soifua tapuai o taulelea Iuta e toatolu i le Atua. O Sataraka, Mesako ma Apeteniko, o i latou ia sa lafo i le ogaumu aasa, ona ua lē usitai i le poloaiga a Nepukanesa. O iina na molimau ai ma a’oa’ina ai Nepukanesa i le fa’amaoni ma le matautia o le Atua o Isaraelu. Ua lavea’iina e le Atua ia taulelea i totonu o le ogaumu aasa. O se vaaiga ofoofogia ina ua molimau i ai ana auauna i tagata e toafa i totonu o le ogaumu aasa, ua lē mafai ona fasiotia. Ae o le silisiliese lea o le Atua na te faia ai vavega ina ia faaola lana fanau e faatuatua faamaoni ia te ia. O le fa’aalia lava lea o lona mana i ē le talitonu ina ia a’oa’oina ma liliu mai e tapua’i ia te Ia e pei ona a’oa’oina ai le tupu o Nepukanesa. Ioe tamaiti, e le mafai e se malosi ona taofia le matautia o le Atua. Ia faamaoni lo tatou talitonu, na te mafai ona lavea’i ia te i tatou i faigata ma puapuaga. Ia manuia tele outou le fanau.

Uiga o Upu:

- i) tomai - fa’ailoa, si’itia tulaga

GALUEGA FAATINO:

Tali Fesili:

1. O ai Nepukanesa?
Tali: (Tupu o Papelonia)
2. E toafia taulelea na lafo i le ogaumu aasa?
Tali: (E to’atolu)
3. O ai igoa o taulelea ia?
Tali: (Sataraka, Mesako, Apeteniko)

4. Aisea na lafo ai i le ogaumu aasa?
Tali: (Ina ua lē ifo i le tupua)

PESE: O le alofa le agalelei.

A’OA’OGA:

1. E silisili ese le Atua.
2. E faatasi le Atua ma i tatou i taimi uma.

.....

**MANATU TAIALA O AOKUSO:
SO’OTAGA O LE TAGATA MA LE ATUA**

E faapefea ona feso’ota’i le tagata ma le Atua? E tele auala na fa’aaogaina e le Atua i le taimi o le Feagaiga Tuai, na Ia feso’ota’i mai ai i lona nu’u o Isaraelu. O fa’aaliga eseese, na iloa ai lona mana ma lona mata’utia; peita’i o nei ona po ma le ta’aviliga ua i ai nei le lalolagi, tatou te le o toe faamoemoe i ni feso’ota’iga i la le tino e mafai ai ona o tatou iloa tino ai le Atua. A ua o tatou fa’alagolago i la le Agaga atoa ai ma le faatuatua i le Atua, o le ata manino lena o le sootaga o le tagata ma le Atua, ma o le ‘au ‘au foi lena o lenei masina mo outou le fanau.

ASO SA: 04 AOKUSO, 2024

MATAUPU: TAPUA’I MA LE LOTO MAMĀ

SINI: Ia malamalama le vasega, e ta’uamiotonunuina le tagata e tapua’i ma le loto maulalo

TUSI FAITAU: Luka 18: 9 – 14

FESOASOANI MO FAIAOGA:

O le ola tapua’i i le Atua, o le loto ua faa maulalo ma le lagonaina o le faatauva. O lona uiga, o se ata faatusa e ta’u mai i le tagata lona le auga ma le Atua soifua. E mafai ona ta’u mai i le faatinoga o le tapuaiga, le ituaiga tagata e i ai lou tagata.

E pei o le faataoto sa faitauina, i le tatalo a le faresaio ma le tagata ao lafoga. Na matua’i manino ai lava le vaai maulalo o le faresaio i le tagata ao lafoga, e ala i upu o lana tatalo faapea mai; “Le Atua e, ou te Faafetai atu ia te oe, ina ua ou le pei o isi tagata, o e fao mea, o e amio leaga, o e mulilulua, e le pei o le la tagata ao lafoga foi”. Ioe tamaiti, o lau tatalo ma lau tapuaiga i le Atua, e te tapua’i ma le loto mama, ae ‘aua nei fai ma ala e te ita ai i le isi tagata, po o le ola faatusatusa e pei ona faia e le Faresaio.

Ae fai mai le tatalo ma le tapua’i a le tagata ao lafoga; “ua tu mamao atu, e le mafaia ona tepa a’e ona mata i le lagi, a ua popo lona fatafata, ua faapea atu, Le Atua e, ia e alofa mai ia te au le tagata agasala”. O le uiga lena o le mataupu mo i tatou vasega feololo, tapuai ma le loto mama. E pei ona faia e le ao lafoga, o lana tatalo ma lana ta’utinoga ua ia ta’utino ai o ia o le tagata agasala, o le tagata ua lagona lona faatauva’a.

O se feau taua foi mo outou le fanau, ia tatou tatalo ma le loto maulalo. O le faatinoga foi lena o lau tapuaiga e faia ma le loto mama, e te ta’utino ai lava oe ia ma lou faatauva i luma o le Atua. Ae ‘aua nei faia i le vaaiga o mata nei maitau mai tagata faapea o oe o le Faresaio, o oe o le faifeau, o oe o le leoleo, o oe o se faiaoga, o oe o se fomai, o oe se fai faatoaga, se fai faiva. Poo a lava o tatou tiute ma nafa, ma tofiga e iloga ai i tatou, ae a tatou feagai loa ma le Atua, ia lagona le loto maulalo, ia tapuai ma le loto mamā ona manuia a lea o mea uma. Manuia outou i le alofa ma le agalelei o le Atua.

Uiga o Upu:

- i) faatuatua - talitonu ma faamoemoe i mea e le o vaaia e mata
- ii) amiotonu - amiolelei, faamaoni, amio ua sa’o i luma o le Atua
- iii) Faresaio - a’oa’o o le tulafono i le lotu Iutaia. E i ai lo latou talitonuga e i ai le ola i tua atu o le oti
- iv) ao lafoga - tax collector, tagata nei latou te aoina tupe poo lafoga mo le malumalu
- v) faataoto - tala faa faatusa

GALUEGA FAATINO: TATALO A LE ALII

Manuia ae a’o le amataga o le solo lea, ma toe a’o ai ma le tatalo o le Alii

Afai e te tatalo
Ia lagona lou loto maualalo
Moeiini lelei ou mata
Tatalo i le Atua i lou Agaga

Lo matou Tama e, o i le lagi

PESE:

Telephone to Jesus
Telephone to Jesus ×2
Telephone to Jesus everyday
I want to talk to Jesus ×2
I want to talk to Jesus everyday
Jesus says He loves me ×2
Jesus says He loves me everyday

A’OA’OGA:

1. ‘Aua le vaai maualalo i le isi ou uso a tagata
2. Tatou lagonaina le faatauvaai i luma o le Atua
3. Ia tatalo i le Atua ma lou Agaga atoa

.....

ASO SA: 11 AOKUSO 2024 (Aso Sa o Tamā).

MATAUPU: ALU I LE FALE O LO’U TAMĀ

SINI: Ia malamalama le vasega, o lo tatou fiafia e alu i le falesa auā o le fale o le Atua.

TUSI FAITAU: Luka 2: 41 – 52

FESOASOANI MO FAIAOGA:

E fitu tausamiga po o sauniga faapitoa i le kalena faa-Eperu lava ia, e faamanatu i lea tausaga ma lea tausaga. Peitai tasi lenei o sauniga taua, e pei ona i ai le tausamiga o le paseka e pei ona taua i le tatou tala sa faamatalaina. E faamanatu ai le faaolataga na faia e le Atua i le Feagaiga Tuai ia Isaraelu. Lea lava ua o’o mai i le Feagaiga Fou ina ua afio mai Iesu, lea lava e faamanatu ma faataua e tagata Iutaia.

O le taimi tonu lava lea na tupu ai le vaaiga e pei ona i ai le tala mo i tatou i lenei taeao. O lea ua mae’a le faamanatuina o le tausamiga e pei ona o ai Iesu ma ona matua, o lea ua sauni e toe foi i lo latou aiga. Peita’i e foi ona matua, ae fai mai le tala na nofo Iesu i Ierusalem e tusa lea o le 12 o ona tausaga. O le mea ua tupu ua popole matua o Iesu, aua o lea ua tasi le po o la latou faigamalaga i luga o le ala, a o lea e le o i ai o ia.

Ona toe fo'i lea o matua o Iesu, ma na la maua ai o Ia i totonu o le malumalu o lo'o nofo o ia i totonu o le au a'oa'o, o loo faalogologo ma tuu fesili i latou. O se mea uiga ese le faamatala e se tamaitiiti o afioga a le Atua, ae na o le 12 ona tausaga, e pei o la Iesu i le molimau a Luka. Fai mai le tali a Iesu ina ua saili Maria ma Iosefa ia te Ia, "Se a ea le mea na oulua saili mai ai ia te au? Lua te le iloa ea e tatau ona ou i le fale o lo'u Tama?"

Manino lava le tali a Iesu, o fea e saili ai o Ia; e saili lava i le fale o lona Tamā, le malumalu. O le faamamafa lena o le mataupu o lenei aso, alu i le fale o lo'u Tama. Ne'i maitau ua le taua ia Iesu ona matua faa le lalolagi o Maria ma Iosefa, a o le molimau a le Tusi Paia, e pei ona tali mai ai Iesu faapea mai e tatau ona ou i le fale o lo'u Tama. Ioe, o lona Tama o i le lagi ma la i le agaga. O le tali a Iesu, leai lava se isi mea e saili ai o Ia, e saili lava i le malumalu le nofoaga e maua ai le mafutaga mafanafana ma le agaga. Faapena i tatou le fanau, ia fiafia e o i le fale o lo tatou Tamā. Fiafia e alu i le falesa e a'oa'o ma faitau i i afioga a le Atua. O le falesa o le nofoaga e mapu ai le tagata mafatia.

Uiga o Upu:

- i) paseka - pesach/Passover. O le sauniga e faamanatu ai le sopoloa o le agelu o le oti ia Isaraelu. O le faailoga o le faaolataga na saunia e le Atua mo lona nuu o Isaraelu
- ii) tausamiga - faiga'ai

GALUEGA FAATINO: Fa'aaliga manatu

Fesili:

O le a se taua o le alu i le falesa i lou lava lagona faa-tamaitiiti ma le teineitiiti Aoga Aso Sa? O a ni auala e faatosina ai, ma faa osofia ai lou alu i le falesa?

Tu'u le avanoa i le vasega e faaali ai o latou manatu i fesili ua tuuaina, ae mafai foi ona tuu ai ma nisi fesili faaopoopo e lau susuga i le faiaoga.

PESE: Come and go with me
 Come and go with me
 To my Fathers house ×3
 Where there is joy ×3

A'OA'OGA:

1. Ia fiafia e alu i le falesa.
2. O le Falesa e mafuta ma tapua'i ai i le Atua.

.....

ASO SA: 18 AOKUSO, 2024

MATAUPU: O LE TATALO A NEEMIA

SINI: Ia malamalama le vasega, a tatou agasala, ona faatoese lea i le Atua e ala i le tatalo

TUSI FAITAU: Neemia 1: 5 - 11

FESOASOANI MO LE FAIAOGA:

Fai mai o le auala lea ma le sootaga e fesootai ai le tagata i le Atua, o le tatalo. O le tatalo e faia ma le loto maualalo, o le tatalo e faafetai, o le tatalo e faatoese ma le tatalo mo mana’oga. E tasi lea o aganuu i le tu ma le aga i fanua faa-Eperu o le anapogi, pe a o’o ina au le ta ma le faasalaga a le Atua. E le gata i lea, a o le anapogi e manatua ai le pau ai o le malo o Iuta ina ua olopalaina e ma fa’tafeaina i nuu ese. E faapena foi le agaga o le mataupu i lenei taeao i le tatalo a Neemia i le Atua.


Fai mai le tala o tagata na totoe mai i le tafeaga ua toe foi i Ierusalem, o le mea ua tupu, ua tetele le puapuaga ma ua faatafunaina ona pa. O le fesili, aisea ua o’o ai le puapuaga ia Iuta, mafua ona o le lē usita’i. O le ala lea o le auē o le perofeta ma tatalo ma anapogi i le Atua ina ia alofagia le tulaga pagatia ua o’o i ai le nuu o Iuta.

O le tatalo faamagalomo le agasala a ona tagata. O le tautinoga ua faia i luma o le Atua ina ua lagona e Neemia le agasala tele a tagata o Iuta. Le agasala o le lē tausima savavali i poloaiga e pei ona poloa’iina ai e le Atua; o le afuaga lea o lona toasa ma o’o mai ai le malaia.

Le fanau, o le tatalo a Neemia mo le nuu o Iuta, o le tatalo foi lea e tatalo ai tatou mo ē o puapugatia. O le tatou tatalo e manatua ai sē o manaomia le fesoasoani faaleagaga, afai ae ola se agaga ona o lau tatalo ma lau fesoasoani; ia viia le Atua. O le taua o le ola tatalo ma anapogi, e faia ma le loto malie ma le loto atoatoa ina ia faafofoga mai ai le Atua i a tatou talotaloga.

Ae muamua ona lagona le loto salamo, ma le loto maualalo ona o i tatou o tagata agasala. E pei ona lagonaina e Neemia i lo laua va ma le Atua, faapea le nuu o Iuta. Ioe, o le malosi lena o le tatalo, auā foi o le auala lea e fesootai ai le tagata ma le Atua.

GALUEGA FAATINO: Faafetaui upu i o latou uiga (Matching)



PESE: Faitau le Tusi Paia ma tatalo i aso uma

A’OA’OGA:

1. E tali le Atua i a tatou talotaloga
2. O le tatalo o le aupega sili lea a soo se tagata Kerisiano
3. Ia fiafia e tatalo i le Atua

.....

ASO SA: **25 AOKUSO, 2024**

MATAUPU: **UA FA’ATUMUINA IESU E LE AGAGA**

SINI: Ia malamalama le vasega, o le Agaga Paia o le Atua e na te fa’au’uina ma faatumuina le tagata.

TUSI FAITAU: Mataio 3: 13 – 17

FESOASOANI MO LE FAIAOGA:

O le molimau a Mataio; o le papatisoga faa le tino na tapena pe na amata e Ioane, e papatiso i le vai. A ua faatali Ioane i le papatisoga o le afi ma le Agaga lea e sau ma Iesu, mea lagona o Ioane auā na ui atu ai ma Iesu i lana papatisoga. A o lona manatu, ou te le aogā ona punou ifo ma tatala i manoa o ona seevae. E le i ta’u fa’atauva’aina e Iesu galuega a le tagata.

O le papatisoina o Iesu o le tu’uina ifo lea o le malosi faasili auā le galuega o sauni ai. I le ma lenei, ua fa’aalia ai le sootaga vavalalata ina ua tatala le lagi ma aumaia le mautinoa o le pule o lo o ia Iesu, aua o Ia lea ua tafatolu i ai le tolu tasi paia, ina ua fetalai manino le Atua, “O lo’u atalii pele lena, ua ou fiafia lava ia te ia”. Ma le Agaga na aumaia le filemu e ala i le tino mai i le lupe. O le uiga foi lena o le mataupu mo i tatou i lenei taeao, ua faatumuina Iesu e le Agaga.

Le agaga lena o le Atua na faamalumu ifo i luga o Iesu, ma ua faatumuina ai o Ia i aupega faaleagaga, aua le galuega fita o faatalitali mai mo Ia. Le pule ua tuuina ifo mai le lagi i le lalolagi, e faamasinoina ai le lalolagi agasala.

O le papatisoga lea i le Agaga. O le galuega amata a Iesu, ua Ia manatu sei alu muamua e papatiso, ona faatoa amata lea o lana galuega. O le papatisoga la o Iesu, e le gata ua aumaia ai le mautinoa ua i ai tatou le atalii pele, a ua tatou mautinoa ai le amanaia e le Atua mamalu o se galuega a le tagata. O le Atua militino ma auai faatasi ma ona tagata agasala.

GALUEGA FAATINO: Faatino le tala o le Papatisoga

Manaia ae tofi ni tamaiti se toafa e faatinoina le tala. Tagata autu, Iesu, Ioane, Agaga Paia, Atua. Ia atagia i le faatinoga le faatumuina o Iesu e le Agaga

PESE: Sweet Sweet Spirit
There’s a sweet sweet spirit in this place

And I know that it’s the spirit of the Lord
Theres a sweet, expression on its face
And I know you feel the precence of the Lord

Chorus:

Sweet holy Spirit, sweet Heavenly dove
Stay right here with us; feeling us with your love
And for His blessings, He lifts our hearts in praise
Without a dout you know, that we have been revive
Whe we shall leave this place..

A’OA’OGA:

1. E faatumuina e le Atua o tatou tagata vaivai ma le faatauva
2. O le afio mai o Iesu, o le faaolataga lea mo le lalolagi agasala
3. E fa’aa’uupegaina i tatou e le Atua, e le ona agaga
.....

**MANATU TAIALA O SETEMA & OKETOPA:
TALA FIAFIA O LE FAAOLATAGA**

E matagofie i luga o mauga vae o e aumai le Tala Lelei. Ioe o le tala fiafia o le Tala Lelei lea o le faaolataga na saunia e Keriso mo le lalolagi agasala. O lona uiga la, e le o se tala faanoanoa poo se tala e leaga. A o le tala o le faaolataga e ola ai le agaga o se tasi o manaomia lena faaolataga. E toatele i latou e le i o’o i ai le malamalama o Keriso, peita’i o le faamalosi lena o lenei masina e saga u’una’ia ai pea i tatou, e fiafia e faasalalalu le Tala Lelei ia Iesu, tala’i atu, faasoa atu ina ia maua ai pea e i tatou le manuia i le ola o i tua atu.

ASO SA: 01 SETEMA, 2024 (Aso Sa Tala Lelei)

MATAUPU: O LE MOLIMAU A LE FITAFITA

SINI: Ia malamalama le vasega, na ta'utino lava le fitafita, o Iesu o le tagata amiotonu.

TUSI FAITAU: Luka 23: 44 – 49

FESOASOANI MO LE FAIAOGA:

O le vaega o le tusi lea na tatou faitauina, o le iuga lea o faiga faa le alolofa ma faiga faasaua na faatinoina e fitafita ma le motu o tagata ia Iesu. Ua o se amataga fou lea ua maua ma ua faia i le soifua ma le ola ole taitaiu o le toaselau poo le fitafita e pei ona aumai e le autu o lenei aso. Peitai, e mafai ona tupu se fesili faapea, Aisea ua te'i ai lava ua sui le manatu male taofi o lenei fitafita, ae leiloa po o ia le isi lea na matua mamafa lana kiki ma lana po i le Alii?

O le tali, e i ai taimi e mafai ai ona suia faafuasei ai la tatou vaai ma o tatou loto ma manatu ona ua lagona le faagaetia ma le fiafia ona o se mea lelei ua faia. E mafai foi ona suia manatu ma lagona ona ua lagona le faanoanoa ma le mafatia ona o ni to'atugā e tutupu ma alia'e mai.

E le taumate o le mafuaaga lea o le molimau a le fitafita, “E moni o le tagata amiotonu lenei,” aua foi, a fua atu i mea na vaai iai, o le upu moni lava, ele ititi ia mea. O tiga foi ma mafatiaga na feagai ma Iesu, e le faatauva. Ioe, mai lava i le afiafi lea na faalaina ai le Alii e Iuta seia paia lona tautau i le satauro i le tutonu o le la o le isi aso, e le o se taimi puupuu lea taimi, pe a ma le luasefulu itula.

E le ititi mea na vaaia e le fitafita, na faia i le Alii Faaola o Iesu. O tigā ia na o'o i le Alii, o tigā e gata ai tigā, a o le mea e ofo ai le loto, o le faalogo atu ua fetalai, faamagalo. “Lo'u

Tama e, ia e faamagalo atu ia te i latou, auā ua latou leiloa le mea ua latou faia.” Fai mai loa e a le molimau a le fitafita? “E moni o le tagata amiotonu lenei. Aisea? Aua foi, o lo o i ai lona manatu e le o le lagona lea o loo i le Alii pe a fua atu i le tele ma le faula'i o mea leaga na faia ia te ia, aemaise ai, o lea ua fa'afesaga'i ma le oti matagā.

O le upu moni lava, ana o se isi o tatou lea e tupu ai le mea lenei, e le valaau faamagalo na o upu fetuu ma upu faamalaia e fai mai. Peitai, le Alii, ua ia le fetuuina ma faamalaiaina le lalolagi, a ua ia faamagalo ma faaola. Auā foi, o le mea lea na ala ai ona afio mai, ina ia faamagalo ma faaola le tagata ua leva ona pagatia, ua leva ona lailai i le loloto o le agasala. O le molimau a le fitafita, e faapena i tatou le fanau, ia fai i tatou ma molimau i le Tala Lelei a Keriso. Ia fiafia e molimau i le Keriso Toetu, e ala i le Tala Lelei ae 'aua tatou te fiafia e molimau i mea faafiafia o lenei olaga, e leai se aoga.

O lenei Aso Sa, ua faapitoa mo le fa'amanatuina o le oo mai o le Tala Lelei ia Iesu Keriso, i totonu o o tatou lafanua. O lea ua mafai ai ona o tatou ola i le Kerisiano ma le fa'a-Talaleiina, e oo mai i o tatou aso.

GALUEGA FAATINO: Faasoa manatu

Tamaiti, o le a sau molimau i le maliu o lo tatou Faaola o Iesu Keriso? Faamatala i lou lava lagona ma lau vaai, le maliu ai o Iesu i le satauro.

PESE: [Tell me the stories of Jesus](#)
Tell me the stories of Jesus, I'd love to hear,
Things i would ask Him to tell me, If he were near
Since by the way side, Tales of the sea
Stories of Jesus, Tell them to me

A’OA’OGA:

1. Ia fiafia e molimau i le Tala Lelei ia Iesu Keriso
2. O le molimau a le fitafita, o le tautinoga a le tagata ua lagona le salamo.

.....

ASO SA: 08 SETEMA, 2024

MATAUPU: O EUTA LE FAAMASINO

SINI: Ia malamalama le vasega, na fa’atoilaloina e le faamasino o Euta le fili o Isaraelu, o Moapi.

TUSI FAITAU: Faamasino 3: 15 – 30

FESOASOANI MO LE FAIAOGA:

O Euta o le faamasino lona 2 lea i le faasologa o faamasino a Isaraelu, e sau mai le ituaiga o sa Peniamina. Faamasino o tagata na tofia faapitoa e le Atua e taitai lona nuu ma tau faasagasagatonu ala o tagata i lana tulafono ma le olaga moomia. O le faafitauli tele na fesaga’i ma Isaraelu o lo latou ola agasala ma le lē usitai i le Atua. Ua pei le olaga agasala o Isaraelu o se faataamilosaga a se asiosio, e aga’i i luma ma toe ta’avili i tua ma toe aga’i foi i luma. Peita’i, e ui ina ola toilalo Isaraelu i luma o le Atua, ae na faapalepale pea ma alofagia e le Atua ona tagata. Na ia ‘faatuina ai le faaola’ mo Isaraelu e fai ma ona aao laveai i lona nuu.

O Euta la o le isi lea fa’aola na faatuina e le Atua, ma o se Faaamasino iloga i ona faiva faa-famasino. O lo o faamauina e 80 tausaga le umi o lana taitaiga o le nuu. O Euta o le atalii o Kira o le tagata o le ituaiga o Peniamina. O se ituaiga e lē matua toatele pe a fua i isi ituaiga o taua i lenei tusi, ae iloga

tagata e tupuga mai ai. O Euta la o le faamasino lona lua, e tulaga ese foi lona fa’aaogaina e le Atua e puipui le nuu mai isi tagata leaga e pei o Moapi ma Amaleka sa i ai pea i totonu o Kanana.

O le mea malie i le faamatalaga a le tusitala - o le ave o lana faamamafa i le aga tauagavale o Euta ma lona taumafai e fa’aaoga lona itu agavale e fai ma fesoasoani i lona fasiotia o Ekelona le tupu o Moapi. E lē se tama’i tagata Ekelona, e fefefe uma i ai tagata leaga o le tupu o Amoni. Peitai e le’i foi ai Euta. E ese lava faiga a le Atua e fa’aaogaina ai ana auauna tofofi. O nisi e malolosi ma tino lelei, o nisi e faaleiloga ma vaiva, o nisi foi e peiseai e faavasivasi ae faaaoga lelei lava e le Atua e faatino ai lona finagalo.

E faapea le tala e matua toatele lava tagata o le ituaiga o Peniamina e aga-tauagavale/agavale la latou aga. A o le agavale lena o Euta, ma lona lotoa ma le faamamalu mai o le Atua i lona tofiga, na fai ma ona sao i le fasiotia o Ekelona le tupu o Moapi, ma faatumauina ai le filemu i totonu o le nuu o le Atua. O lona uiga o le sao lena o Euta mo le nuu o Isaraelu, ma lona tofi faa-faamasino na tofia ai e le Atua. Ioe e eseese auala e filifilia ai i tatou e le Atua ma fa’aaogaina ai le tagata mo lona finagalo.

Uiga o Upu:

- i) kupita - o le fua, e fua ai le umi, lautele ma le loloto. Mo se ii) faataitaiga, a tasi le kupita ua tasi le mita. O lona uiga e tasi le mita le umi (height), tasi le mita le lautele (width), tasi le mita le loloto (depth)
- ii) fa’ataumaai - double edge o lona uiga e maamaai uma ona itu e lua, o lo o

faatusa i ai le maai o le pelu sa
fa'aaogaina e Euta

GALUEGA FAATINO: Paso (Euta, Faamasino, Moapi,
Ekelona, Peniamina, Kira)

E	G	T	P	E	R	T	B	K	M
O	U	T	K	K	D	I	M	K	O
K	F	T	M	E	U	U	I	N	A
L	K	Y	A	L	A	R	S	D	P
N	A	E	B	O	A	G	R	X	I
S	E	P	I	N	A	G	Y	W	O
P	E	N	I	A	M	I	N	A	P
F	A	A	M	A	S	I	N	O	L

PESE: Tatou o le au tau a Keriso
Tatou te o i luma mo le Alii,
Ma tau lana vaegaau
Tatou te le faiaina pe tu i le agasala,
Le Alii o lo'u malosi tatou te manumalo

Tali:

Satani ma lana vaegaau,
Faasagatau mo le Alii
Tu'u i luga lau talitā tago i le pelu o le agaga
Tatou te o i luma mo le Alii

A'OA'OGA

1. E faaaogaina e le Atua tagata faatauva
2. E 'au le Atua ma i tatou i taimi uma
3. O le Atua e pule aoao i mea uma

.....

ASO SA: 15 SETEMA, 2024

MATAUPU: E LE O LE OFUTAU MA LE
MALOSI

SINI: Ia malamalama le vasega, e le i'u lelei se
tagata e loto faamaualuga.

TUSI FAITAU: 1 Tupu 20: 1 – 12

FESOASOANI MO LE FAIAOGA:

O A'apo o le tupu lena o Israelu i le itu i matū, lea e i ai ona
ituaiga e sefulu, lea na ō i le pito i luga ina ua vaeluaina le mālō
o Israelu; i le taimi o le nofoaiga a le tupu o Reopoamo le
atalii o Solomona. O le taimi o le vaeluaina o Israelu na
taumafai mālō tetele e ave faapologa tagata o le nu'u o le Atua.
Lea la e i ai ma Suria ma lo latou tupu o Peniata, ua latou
taumafai e fa'ao'o atu lo latou pule faamalosi. O le mea moni
lava, mǎnū lava e faoa uma e Suria auro ma ario a le nuu o le
Atua, pei ona faamatala mai e le tala.

Ua atu lua ona alu le sāvali a ali'i o le nuu o Suria ia A'apo ma
le nuu o Israelu e aumai uma auro, o ario, o lana fanau ma ana
avā, e fai mo Peniata. O le a le tali a A'apo? "Le alii e, le tupu,
o a'u nei, ma a'u mea uma o a'u ia, e pei ona fetalai mai ai". E
le i ai se manatu o A'apo o le a na ia tu'ufauina le mea ua
mana'o ai le tupu o Peniata. Manino lava le tali a A'apo, e
leai....mea ua e finagalo i ai, o a'u ia. A tu'u i se isi ona
faamatalaga, sili ai pe ana faapea A'apo leai alii Peniata e leai
ma sau feau, 'aia e te fia pule, 'aia e te fia fai mea fua i mea a
isi.

Fai mai ua logo e Aapo toeaia o le nuu o Israelu ma ta'u i ai
le mana'o o Suria peitai e le i usitaia lava. Na ta mau lava le
nuu o Israelu, e 'aia, 'aia lava nei usitaia le mea ua manana'o
mai ai. Ua amata ona veveta le toto o Peniata i le le fiafia ia

Aapo, peitai e le i popole i ai o ia. Ua nofo sauniuni Isaraelu uma, auā e mautinoa lava o le taua le mea e mulimuli mai.

Ua faamoemoe Suria i ana ‘au ma ana fitafita, ua faamoemoe i lo latou malosi ma lo latou popoto i taua. Peitai e le i popole i ai Isaraelu. E mautinoa lava o le faamoemoe tu tasi lava lea na o atu ma Suria, e le gata o le faatoilaloina o Isaraelu ae ia aveese uma lona tamāoaiga.

Fai mai le tali a Aapo ia Peniata, “Ona tali atu lea o le tupu o Isaraelu, ua faapea atu, Inā fai atu ia ia te ia, ‘Aua le mitamita lē ua fusi ia te ia i le ofu tau, e pei o lē na te tatalaina”. Manino lava le tali a Aapo ia Peniata, ‘aua le mimita i le malosi, e le o le ofu tau a o lē na te tatalaina.

O lea ua saunoa sa’o a Aapo, e le o le ofu tau a o le tagata e na te tatalaina le ofu tau. O lona uiga, e le o le amataga a o le faaiuga. ‘Aua le mitamita i le amataga, a o le i’uga o se galuega. ‘Aua le naunau tele i le taua ma le malosi faa le tagata auā o le faatoilaloina lava le tali. O le faaiuga o le mataupu, fai mai na faatoilaloina e Isaraelu Suria; ua latou fasia le selau o afe o ‘au e savavali i le aso e tasi. O lona uiga, matua’i faatoilaloina lava e Isaraelu Suria, e ui so latou ma’ema’eā i le amataga. E faatoilaloina lava le tagata faamaualuga, ae faaeaina le tagata faamaualalo.

GALUEGA FAATINO: Tusigā Tala

Tusi mai sau tala e faatatau i le ulutala lea “O le malosi o le Atua”. E tasi le itulau o lau tala, ia po’o le afa itulau foi.

PESE: Great is thy faithfulness
Great is thy faithfulness, O God my Father
There is no shadow of turning with Thee
Thou changest not, Thy compassions, they fail not
As Thou hast been, Thou forever will be

Chorus:

Great is Thy faithfulness×2
Morning by morning new mercies I see
All I have needed Thy hand hath provided
Great is Thy faithfulness, Lord unto me

Pardon for sin and a peace that endureth
Thine own dear presence to cheer and to guide
Strength for today and bright hope for tomorrow
Blessings all mine with 10,000 beside

A’OA’OGA:

1. E leaga le faamaualuga
2. ‘Aua le mitamita i le malosi, ma ofutau faa le tino, a o le malosi o le Atua
3. Fai e le Atua mea sili mo lana tagata

.....

ASO SA: **22 SETEMA, 2024**

MATAUPU: **O LE MALOSI O LE ALOFA**

SINI: Ia malamalama le vasega, e leai lava se tasi alofa e tutusa ma le malosi o le alofa o le Atua

TUSI FAITAU: Sakaria 10: 1 – 12

FESOASOANI MO LE FAIAOGA:

O ai lea e faatatau i ai le alofa o le Atua? O le tali o Isaraelu ma Iuta. O le mea moni, o lo o talanoa le perofeta i le manuia o le a pale ai lona nu’u. O le a lena manuia? O lea o le a toe a’e le tafeaga.

O lea la e talanoa mai le perofeta, e toe aumaia lava e le Atua lona nu'u. O lona uiga, e ui lava o auala na faia e le Atua e a'oa'oina ai Isaraelu, peita'i e na te saunia fo'i nisi auala e na te toe fa'asaoina ma fa'aolaina ai lona nu'u. O le uiga foi lea o le igoa o Sakaria o lo'o fa'aliliuina mai le Tusi Paia Eperu (God remembers). O lona uiga e manatua pea e le Atua. E pei foi la ona i ai le mataupu lenei e 10 sa o tatou faitauina. E le i mafai ona faagaloina e le Atua lona nu'u na latou osi feagaiga.

Fai mai le fuaiupu e 6, "Ou te faamalosia le aiga o Iuta, ma le aiga o Iosefa ou te faaolaina lea; ou te faanofomauina foi i latou, auā ua ou alofa mutimutivale i ai; e ave a i latou, e peiseai na ou le lafoa'iina i latou; auā o a'u o le Alii lo latou Atua, ou te talia i latou." O lona uiga, e toe aumai lava e le Atua lona nu'u o Isaraelu. E ui ina faatafea le nuu, ae o loo manino le fetalaiga a le Atua "...ou te fa'anofomauina foi i latou..." o lona uiga (*God gives freedom*) o le Atua e na te fa'asa'olotoina lona nu'u. O le Atua lava e na te aumaia le faaolataga mo ona tagata.

O le faailoga foi na e iloa ai le malosi o le alofa o le Atua. O le malosi e gata mai ai malosi. E le mafai e se isi lava malosi ona ia ausia le tulaga maoa'e o i ai le malosi o le Atua. E le i mafai e le malosi o Asuria ma Papelonia, o ana 'au tau ma ana fitafita mata'utia ona sofa'ia le Paia Silisili Ese o le Atua. O le faailoga moni o le malosi o le alofa. O le alofa lea faa le Atua, po'o le AGAPE. O le alofatunoa Silisili Ese o le Atua, na ia alofa mai ai i lona nu'u o Isaraelu...na Ia fa'aolaina mai i ona fili sauā. E le i vaivai le alofa o le Atua ia Isaraelu. E le i faavaivai le feso'ota'i mai o le Atua i lona nu'u na la osi feagaiga.

O le uiga fo'i na o le tatou mataupu mo lenei aso, o le Atua na te saunia le faaolataga ma aumaia le sa'olotoga moni mo lona nu'u. O le fa'amalosi na a le perofeta o Sakaria mo Isaraelu ma Iuta. O le Atua na te faamalosia i latou. O le Atua e alofa i lona nu'u. O le fa'aailoga o le malosi i le alofa. Ailoga e i ai se tasi e malosi faapea sona alofa e na te lavea'iina se isi tagata. Ae a le

alofa o le Atua, o lona alofa e fusifusia ai mafatiaga ma avega mamafa.

Uiga o Upu:

- i) uaga - timuga
- ii) faanofomauina - settle, restore, faatumauiina, toe faaola
- iii) mapumapu - faailoa, valaau
- iv) fa'apa'umatuina - struck down, dried up, ua faaleagaina, matūtū, talepeina

GALUEGA FAATINO:

Fa'atumu avanoa (Alii, uaga, uila, timuga, mutia, tupua, togafiti, pepelo, faataulaiti, faamafanafana, mamoe)

"Ole atu ia outou i le _____, ina ia ua i ona po o le _____ mulimuli; e faia e le Alii _____, ma foaiina atu _____ tetele ia te i latou, o _____ o le fanua ia te i latou uma. Auā ua tautala _____ i mea le aoga, ma e fai _____, _____ ua latou vaaia le _____, ma latou tala mai miti _____, ma latou _____ fua; o le mea lea ua o ese ai latou pei o _____ sa tigaina ina ua leai se leoleo"

PESE:

Love is something that you give it away

Love is something that you give it away, give it away, give it away

Love is something that you give it away

Because it comes right back to you

It's just like a magic penny

Hold on tight and you won't get any

Lend it, spend it and give it away

Because it comes right back to you

A’OA’OGA

1. E malosi le alofa o le Atua
2. E alofa le Atua ia i tatou uma

.....

ASO SA: 29 SETEMA 2024

MATAUPU: IA MATAALA I TAIMI UMA

SINI: Ia malamalama le vasega, e mo’omia lou sauniuni i taimi uma

TUSI FAITAU: Galuega 20: 7 – 12

FESOASOANI MO LE FAIAOGA:

O le vaivai ma le fiamoe, e talitonu le manatu, e leai lava ma se isi e lē maua ai. Aemaise lava i totonu o aoga i taimi o le vasega. E le gata o totonu o le aoga, ae faapea foi le lotu i taimi o lauga, e pei o le taimi lea e fai lelei ai le malologa a le isi tagata. O le fa’ataua o lenei mataupu ina ia iloa ai e le tagata ona ola mataala, ma mataalia i taimi uma.

E pei foi la o le lauga faaumiumi a Paulo e pei ona tatou faitauina. Fai mai ua fa’alevaleva ua o’o i le tulua o po. A o faalogologo lona au so’o i le afeafe aupitoaluga ma i latou na molimauina le lauga a Paulo, sa i ai ma le tama lea o Eutiko sa nofo i le faamalama. A o faia pea le lauga a Paulo, ona maua ai lea o si tama o Eutiko i le moe gase, fai mai le tala ua pa’ū mai o ia i le tolu o pae o le fale ma maliu ai lava.

O lona uiga e foliga mai e fogafale tolu le fale lea na pa’ū ma ai Eutiko ma maliu ai o ia. A o le vaaiga uiga ese na molimauina, ona alu ifo lea o Paulo mai le afeafe aupitoaluga ua faapau fao i luga o Eutiko ma fusi ia te ia. E foliga mai na faia e Paulo le

vavega tele i le maliu ai o Eutiko. Peitai manino lava le tala, ona toe aumai ai lea o Eutiko mai le eleele ua toe ola, ma ua faafiafiaina a i latou, ua latou tofitofi areto ma aai ua latou talatala leleva seia o’o ina ao.

O le faamamafa o le mataupu, ‘aua le matamoe, e taua lou mataala ma lou mataalia i taimi uma. toatele i tatou e maua tele i lea ma’i, ae vaai oe nei e moe ona tupu ai lea o se faafitauli. Ua aoao mai foi lenei tala, i le faatuatua tele o Paulo ma lana galuega sa fai ia Eutiko. Ioe, e matautia lava vavega e faatepa ai e le Atua i tatou. E lelei lava lou moe ala ala, ae leaga lou moe gase ma e moe loa atu ai.

Uiga o Upu:

- i) Afeafe aupitoaluga - nofoaga/potu/vaega pito i luga o le fale e nonofo ai tagata

GALUEGA FAATINO: Mategā Tupua

Ou te nofo i le manava o le eleele, e pule foi le pogisa ia te au. O a’u e tini taunuu i ai le tamoega o foliga vaaia ma le lalelei o le tagata. E fai a’u ma fili o le ola, peitai na ona feita ae ua na o a’u le auala e iloa ai le fe’ilafi o le ola. Ou te le faailoga tagata, so’o se tasi e tu’itu’i mai i lo’u faitoto’a, ou te tatala le avanoa ma fa’a-ulufale ia te ia. E ma te mafuta e o’o i le faavavau.

1. O ai la a’u?????

Tali: O le tu’ugamau

PESE: O le nofoaafi o le Tala Lelei

A’OA’OGA:

1. E taua lou mataala i taimi uma

2. 'Aua le matamoe

.....

ASO SA: 27 OKETOPA, 2024

MATAUPU: E LE TAUANAUIA LE TAIMI A LE ATUA

SINI: Ia malamalama le vasega, e i ai lava le taimi o le tagata ma le Atua

TUSI FAITAU: Salamo 39: 4 – 6

FESOASOANI MO LE FAIAOGA:

O le Salamo sa faitauina, o lea ua fesiligia e Tavita le Atua. Peiseaī o lea ua tauanau e le tupu o Tavita le taimi. “Ia e faailoa mai ia te a’u lo’u iuga”. E ese la le ituaiga taimi lea e pei ona talanoa mai ai le tusi faamamafaina mo i tatou. O lo’o ta’ua i le mataupu 38 fuaiupu e 5 e faapea “Ua elosia o’u manu’a; ua alu a’e le alou ona o lo’u valea”

O lona uiga, ua lava a upu nā e ta’u mai ai ia i tatou le tulaga ogaoga o i ai le ma’i o Tavita. O le mataupu la e 39, e peiseaī o le taimi o le luluti o tigā o le ma’i o Tavita, o le ala lea o lana aioi fa’atauanau i le Atua. E foliga o le aioi a se tagata ua leai se fa’amoemoe. O le valaau a le tagata ua leai se faatuatua, ua leai lava a ma se isi mea o totoe. O le ala foi lea o le fesiligiaina e Tavita, pe le o le taimi ea lenei o ia. Fai mai le fuaiupu e 4 “Le Alii e, ia e faailoa mai ia te a’u lo’u i’uga, pe se a foi le fua o o’u aso; ina ia ou iloa pe fia ni aso ua toe ia te a’u”

Aisea ua fesiligia ai le taimi a le Atua? Ua galo ea ia Tavita le taimi o le tausiga a le Atua ia te Ia, taimi o le sologa lelei o le soifuaga. Ae na ona o’o mai lava o puapuaga, ona fesili loa lea i le Atua e fa’ailoa mai le i’uga. Mafua ona tutupu nei ituaiga

lagona ona ua le lava le faatuatua. Ua sola le faamoemoe ola, o le na tu mai i matagi ‘olo i taimi uma ma aso uma. E le tauanauina e le tagata le taimi o le Atua.

O le mea lena e pule ai lava le Atua. Pei ona iai le mataupu silisili o le Atua e pule aoao i mea uma. O lona uiga o le Atua foi e pule i le taimi o le tagata, a ua finagalo le Atua o le i’uga lea mo le tagata, ia o lena lava. Ae afai e leai, ia e tu’u mai lava e le Atua le taimi ma le avanoa. Ae a tauanau loa e le tagata le taimi, o lona uiga ua fia pule le tagata i le taimi a le Atua. Ua fia poto le tagata i le Atua ma le gasologa o mea o lana foafoaga.

GALUEGA FAATINO:

Faatumu avanoa (faailoa, i’uga, fua, aso, toe, lautele, alofilima, olaga, peiseai, malolosi)

Le Alii e, ia e _____ mai ia te au lo’u _____, pe se a foi le _____ o o’u _____; ina ia ou iloa pe fia ni _____ ua _____ ia te au. Faauta, ua e faia o’u _____ e pei o le _____ o le _____; o lo’u _____ foi, ua _____ ua leai i ou luma; e moni o tagata uma a o _____ e matua faatauvaa lava i latou.

PESE: I the Lord of sea and sky

I the God of sea and sky, I have heard my people cry
All who dwell in deepest sin, my hand will save
I who made the stars of night, I will make their darkness bright
Who will bear my light to them? Whom shall I send?

Chorus: Here I am Lord, is it I Lord?

I have heard you calling in the night

I will go Lord, if you lead me
 I will hold your people in my heart
 I the Lord of wind and flame, I will tend the
 poor and lame
 I will set a feast for them, my hand will save
 Finest bread I will provide, till their hearts be
 satisfied
 I will give my life to them. Whom shall I send?

A’OA’OGA:

1. E faasoa mai lava e le Atua lona taimi mo le tagata
2. ‘Aua tatou te tauanauina le taimi a le Atua
3. O le faatuatua, o le faamoemoe lea ma le faalagolago i mea e le o vaaia e mata.

.....

**MANATU TAIALA O NOVEMA:
 FAAPAIAINA LO TATOU OLA I ASO UMA**

O le ola faapaiaina po o le pietism e maua mai le upu Latina o le pietas. O lona uiga o le usitai, faamaoni ma le amiotonu. Ua manatu lenei masina ma le faamamafa mo i tatou le fanau, e taua le ola faapaiaina i luma o le Atua. Toe tasi le masina aulia le faaiuga o lenei tausaga, nei galo ia i tatou le fanau, ona faatino le ola faapaiaina i luma o le Atua.

ASO SA: 03 NOVEMA, 2024

MATAUPU: O LE ATUA LE FOMA’I SILI

SINI: Ia malamalama le vasega, o Iesu lava o Ia o le foma’i o foma’i e malolo ai le tagata puapuagatia.

TUSI FAITAU: Numera 21: 4 – 9

FESOASOANI MO LE FAIAOGA:

Ina ua o ese mai le nuu o le Atua mai Aikupito, na matua’i vaai le Atua i le faalogogata ma le lē usitusita’i o tagata Isaraelu. Ua o’o i luma o le Atua le tomumumu o tagata o lona nuu. Ua galo le agalelei o le Atua, ina ua mafatia ma tigaina. O le ma’i lea o lo’o ma’i ai le nuu, o le ma’i galo, galo le alofa o le Atua, o le ma’i tomumu, tomumu ina ua tigaina, o le itaita gofie, ita ina ua le faia le mea o lo o mana’o i ai. O faafitauli ia o lo’o maua ai le nuu o le Atua. O faafitauli e manaomia ai se fofō ina nei tupu tele ma pesia ai le toatele o tagata.

Le fofō la lea ua faia e le Atua, gata uogo ua auina mai, sei faatei tasi le tagata, ina ia mafai ona lagona le leaga o le mea o loo fai, a ia maua le loto salamo, lagona le faamaulalo, ma liliu ese mai i ia vaivaiga, ae tulitamo’e pea i luma sona ai, aua le Atua ma lona finagalo. E ese a faiga a le Atua, e ese foi auala e fa’ao’o mai ai lona finagalo ma lana faamalologa i le loto o le tagata ua mafatia, ona o le tele o faafitauli o lo o lutia ai le soifua ola. E ese foi auala e saunia e le Atua e o’o mai ai lana a’oa’iga atoa ai ma lana faamalologa. O le feutiaina o le nuu atoa ai ma le tele o le ola na faatamaia, o le a’oa’iga lea a le Atua e tusa ma le amio sa faia.

Ioe, a tamaiti, e ese foi auala a le Atua le foma’i sili e fofōina ai le ma’i o le nuu o Isaraelu. E le taumate, sa manatu tagata, e tele foma’i ma taulasea i totonu o le nuu, e tele foi ē fai vailaau faataulaitu e mafai ona saili i ai auā se togafitiga ma se lavea’iina, peitai, e le mafai lava e le iloa o le tagata ona suia le finagalo o le Atua. Po’o le a le maoa’e o le poto ma le atamai, o le a foi le telē o le silafia, ae afai e le o le finagalo lea o le Atua, e le mafai lava ona manuia ma lelei se sailiga po’o se taumafaiga foi. E faapena le tulaga lea ua o’o i ai le nuu, ua fiu e saili solo e le maua se vaifofo. Aisea? sesē le mea o lo’o

fa'amamafaina, ua saili se fofu mo le ū a le gata uogo, a ua le sailia se fofō o le loto maa ma le faalogogata i le Atua.

O le Atua o le foma'i sili. O le taimi lava na lagonaina ai e le Isaraelu, o Ia le faapogai o le oo mai o puapuaga, o le taimi foi lena na maua ai ma le vaifofo. A lea ua faatoese ma ua toe foi i le Atua. Fai mai le fuaiupu e 7 "ua matou agasala, auā ua matou fai upu i le Alii atoa foi ma oe; ia e tatalo i le Alii ia aveese e ia ia gata ia te i matou." o le augani a le tagata ua lagona le salamo. Ua iloa le leaga o le mea sa fai, ua fulitua i ai, ae toe foi i le Atua. Ioe, foi e maua ai lona to'afilemu. Lea ua saunia e le Atua le auala e fa'ate'a ai le popole ma le atuatuavale o loto o tagata. O le a lea auala? o le tepa a'e i luga, vaai i le gata apamemea o lo o tautau i le laau. O le vaifofo lea e fa'ate'aeseina ai le malosi o le oona o le ū a le gata uogo, ae toe maua le malosi faafouina e ala lea i le mana faaola o le Atua. Le mana e fesoasoani mai, e faatupu ai le lototele, e fa'auau ai le malaga ma le savaliga umi e pei ona latou tauasa mai ai i le tele o aso.

GALUEGA FAATINO: Fetufaa'iga

Vaavaai i le galuega a ali'i ma tama'ita'i foma'i, e ala lea i le togafitia o ma'i. Faamatala po'o le a se feso'ota'iga o le galuega faa foma'i (doctor), ma le galuega faaola a Iesu Keriso i le lalolagi.

PESE: Jesus loves the little children

A'OA'OGA:

1. O Iesu le foma'i sili e malolo ai i tatou
2. 'Aua le tomumu i le Atua
3. E faaola e le Atua i tatou

.....

ASO SA: **10 NOVEMA, 2024**

MATAUPU: **O LE LAULAIFAIVA O LE AFI**

SINI: Ia malamalama le vasega, o le laulaufaiva o se mea itiiti ma faatauavaa, i le tino o le tagata, ae ua faatusaina e mu ai le vao e tele.

TUSI FAITAU: Iakopo 3:1 – 10

FESOASOANI MO LE FAIAOGA:

E foliga mai o lea e faamamafa mai e Iakopo le laulaufaiva ma mea leaga e tutupu mai ai, i le Tusi sa faitauina. Fai mai le autu mo i tatou le fanau i lenei taeao, "O le laulaufaiva o le afi". O se fesili faatupu manatu mo i tatou, pe aisea lava a ua faatusaina ai le laulaufaiva o le afi?

O loo taua i le fuaiupu 5 & 6 faapea mai "E faapea foi le laulaufaiva, o le mea itiiti lea, a ua lafo upu faausausili. Faauta, o le afi itiiti e mu ai le vao laau e tele. O le laulaufaiva o le afi lea. O le faupuega lea o amio leaga ua tuuina i o tatou tino uma, ua faamuina ai le olaga nei uma lava; ua faamuina foi lena mai Kena". O le a lona uiga? O le laulaufaiva e faupu'e mai ai mea leaga, o le laulaufaiva e na te faaleoina mai i fafo mea olo'o i totonu o le loto o le tagata. E ui lava la e le o mafaia e le loto po o le mafaufau ona gagana mai, a o le laulaufaiva o le auala lea na te momolia mai i fafo se feau.

Ae afai o le laulaufaiva e na te momolia maia i fafo mea lelei, e faapena ona sologa lelei le va nonofo ai. E pei o le vaisua lea na tautala ai Iakopo, o le taumafai o le aposetolo ina ia maua le nofo filemu i tagata o le lotu. Ia maua e tagata Kerisiano Iutaia le filemu moni o le Atua, e faasoa ai i ana afioga. Ia avea le laulaufaiva e fai ma ala e momoli mai ai upu ma tala lelei. Ae 'aua nei fai ma ala e momoli mai ai upu faatiga e aafia ai le isi

uso a tagata. O lea ua faatusa e le aposetolo, le laulaufaiva fai mai e pei o se uli o se va'a, e na te faatonutonuina le va'a atoa. E pei foi o le faagutu o le solofanua, e na te ta'ita'iina ma fa'atonutonuina le solofanua atoa.

E faapena le laulaufaiva, o se mea itiiti ma le faatauvaa, a o le faupuega o mea leaga uma ma le afi o lo o tutuina e mu ai le vao tele. Faauta i le loloto o saunoaga a le aposetolo, auā ua silafia e le aposetolo, o mea ia o lo o tutupu i totonu o le Ekalesia ma le talitonuga faa Kerisiano. Tatou le fanau, fa'aaoga tatau lou laulaufaiva e momoli ai le feau ma le Tala Lelei ia Iesu Keriso. Nei faapea mai le tatou mataupu o le laulaufaiva o le afi, ona aveesea ai lea o le taua o le laulaufaiva i le tino o le tagata.

Lea ua tatou manino ma malamalama i le telē o le taua o le laulaufaiva i vaega e 5 eseese o le tino o le tagata. O mata e vaai, o taliga e faalogo, o le isu e sosogiina le manogi, o lima e pa'i pe tago ai i se mea faitino, ma le laulaufaiva ma le gutu e tofo ai ma tausami ai le meaai. Ioe o le taua lena o le laulaufaiva, ae ua faatusa o se mea faatauvaa, e na te faatonutonuina le tino atoa.

GALUEGA FAATINO: List five senses of a human body and their function

Faatalanoa tamaiti i le taua o faalogona i vaega taitasi o le tino o le tagata. Faataitaiga: o le a le taua o mata, taliga, isu, gutu, lima

PESE: O lima galue ma vae momo'e

A'OA'OGA:

1. Ia avea o tatou laulaufaiva ma faupuega o mea lelei
2. Fa'aaoga tatau lou laulaufaiva i mea aoga ma mea taua
3. Tautala lou laulaufaiva i upu o le alofa.

ASO SA: 17 NOVEMA, 2024

MATAUPU: FAI I TATOU MA AUAUNA

SINI: Ia malamalama le vasega, i le avea o i tatou ma auauna i isi tagata

TUSI FAITAU: Ioane 13: 1 – 11

FESOASOANI MO LE FAIAOGA:

O le avea o i tatou e fai ma auauna, ma tagata tautua; e le o se mea faigofie. Tatou te naunau lava e tatou te fia maua le mea sili. Peita'i o le galuega a Iesu, na ui mai o Ia o se auauna. O se auauna na mulumuluina vae o lona au soo e ui i lo latou le malamalama. Ua silafia lelei e Iesu ua oo mai ona itu aso. O le a toe maliu atu o ia i lona Tama. Faimai le tala a o fai le talisuaga o le paseka, ona tulai lea o Iesu ua to ese ona ofu, ua ia liligi foi le vai i le ipu e mulumulu ai vae o ona soo.

Fai mai le fesili a Simona ia Iesu, “Le Alii e, e te mulumulu ea o’u vae?” Ae a le tali a Iesu “O le mea ou te faia, e te le iloa nei, ae mulimuli ane e te iloa”. O le mea e lilo i le tagata ae manino i le silasila a le Atua. Lea ua amata tāpena ma saunia e le Atua lona au soo auā le galuega o lo’o fa’atalitali mai, o se galuega e tumu i fita ma faigata. E le gata i lea, o le tapena ai foi o Iesu auā ua lata mai ona puapuaga. O se feau taua lea e taumafai Iesu e ta’u atu i lona au so’o, e ala i lona mulumuluina o ō latou vae. O se galuega e le mafai e se Tupu ona Ia faia i ana auauna, e pei ona faia e Iesu.

O se fesili faatupu manatu, se a le mea na le mulumulu ai le tino atoa ae ua mulumulu lava na o vae o le au soo? Ae a le tali a Iesu, “O le ua taele, ia tau na o ona vae, ae mama uma ai, e le aoga ona mulumulu uma”. E le o faapea la, ua le taua le mulumulu o le tino atoa. O le uiga o le saunoaga a Iesu, o le mulumuluina o vae o se mea e faatauvaa i le vaai. O aoga ia

a Iesu mo lona au soo. O vae e faatino ai feau, e savavali i taimi pe a oo ina alu malaga, o vaega foi o le tino o le tagata e palapala i taimi uma. Lea ua ia fofola le alafua mo lona au soo. Ae a i tatou, faamata e mafai ona ta faia lea galuega i isi tagata e aunoa ma se mafuaaga. O le ola faa auauna, e auauna atu i isi tagata lea e taumafai Iesu e tau atu i lona au soo e ala i le mulumuluina o o latou vae.

O le mafuaaga foi lea na ia saunoa manino ai “Afai ou te le mulumulu ia te oe, e leai sou tofi faatasi ma au”. O le tiute lea o le tagata, e ola auauna e le na o isi tagata e auauna iai ae faapea ona auauna i le Atua ma le loto atoa. Faimai le upu; o lalo e maua ai malo. A lea ua amatamea Iesu e ala i le mulumuluina o vae o lona au soo. Lea ua tapenaina e Iesu lona au soo, amata mai lava i mea faatauvaa o mea e le amanaiaina e tagata, a o mea pito i sili ia ona tāua.

Uiga o Upu:

- i) mulumulu - solo, fufulu ese
- ii) Talisuaga - faigaai

GALUEGA FAATINO:

Faatino le tala i le mulumuluina e Iesu o vae o lona au so’o

PESE: Majesty

A’OA’OGA:

1. Ia fai tatou ma auauna atu i nisi o manaomia le fesoasoani
2. ‘Aua tatou te fia sili.
3. E taua le lagonaina o lou faatauvaa i so o sau faatinoga o lo o fai

ASO SA: 24 NOVEMA, 2024

MATAUPU: O LE SAPATI

SINI: Ia malamalama le vasega, i le taua o le sapatu i tagata Isaraelu

TUSI FAITAU: Levitiko 23: 1 – 3

FESOASOANI MO LE FAIAOGA:

O le upu Sapatu, e sau mai le upu Eperu o le shabat, o lona uiga o le faamuta po o le malolo mai se galuega, rest or cessation from labour. A o le fesili, Aisea ua faatauaina ai e le Atua leni aso? Aua o le aso na malolo ai le Alii i lana galuega o le foafoaga. A lea e molimau mai ai le Tusi o Kenese. E ono lava aso na galue ai le Atua, a o le aso fitu, o le aso lea na malolo ai, faamanuia atu lea e le Atua i le aso fitu, ma na faasaina ai; auā na malolo ai o ia i lana galuega uma.

E taua i le Atua le maua o se taimi e malolo ai mai le tele ma le anoanoai o feau ma galuega o le ola nei. E taua auā e maua ai le malosi faafouina, aemaise o se aso e vivii atu ai i le Alii, e pei ona tatou faatauaina ai le o i le lotu i le Aso Sa. Ioe, tatou te faapaiaina le Sapatu e ala i le matuā malolo lelei mai feau ma galuega aemaise o mea e masani ai i le vaiaso. O se taimi tatou te mafaufau ai i le alofa ma le agalelei o le Atua, i mea matagofie o lana foafoaga mo i tatou.

Afai la ua fetalai le Atua, Ia tatou manatua le Aso Sapatu ia faapaiaina.” Ou te manatu, ua matua tatau ma onomea ia te i tatou ona utagia lea tulafono, auā foi, o lo tatou malolo ma filemu i le Aso Sapatu; o le faailoga lea o lo tatou agaga fa’aaloalo i le Atua. O le faailoga o lo tatou faaeaea ia te Ia, ma le agaga Faafetai ma viiga.

Peitai, o le tasi leni o poloaiga a le Atua ua tele ina le amanaiaina e le tagata. Auā foi, ua le avea le Aso Sapatu ma aso

e malolo ma mafaufau ai i le Atua ma lona alofa, ua le avea ma aso e olioli ma fiafia ai le tagata i le Alii, ae ua fai ma aso o tafaoga, fai ma aso o taaloga. O se avanoa foi ia mapu ane ai teisi mai feau ma galuega o le vaiaso, malolo sei fai sina koma, saili malosi aua le vaiaso fou ma ona foi feau. O le Sapati lava ia na faia e le Atua e malolo ai, ae faapena foi ona malolo atu ai ma le tagata mai i galuega sa fita i tuga ai.

GALUEGA FAATINO: Fa'aaliga manatu

1. Afai o lea ua fai mai le tatou mataupu, o le Sapati o le aso e malolo ai mai i feau ma galuega. E malolo ma mapu ane te isi aua se isi malosi faa sili. O le fesili mo le fanau, ae faafefea la le tagata e foma'i o lo o galue i le Aso Sa, pe le o agasala o ia i luma o le Atua e ala i le soli o le Sapati i le Aso Sa? O le a sou manatu?

Tali: Ina ua afio mai Iesu Keriso i le Feagaiga Fou, e le i fa'aleaogaina e Iesu le tulafono o le Feagaiga Tuai, ae na afio mai e fa'asa'o le Tulafono. Mai le tele o ana a'oa'oga aemaise o ana galuega faamalolo o lo'o molimau ai le au fai evagelia, sa faamalolo ai e Iesu tagata mama'i i le Aso Sapati. Le ala lea o le tete'e o le au faresaio ia Iesu, fai mai ua soli e Iesu le Sapati ina ua ia fai ai le galuega. Peita'i, manino lava le tali a Iesu i le au faresaio, ina ua fesili pe tatau le faamalologa i le Sapati. Fai mai le Mataio 12: 11 & 12 "Ona fetalai atu ai lea o ia ia te i latou, "O ai ea so outou e ana le mamoe e tasi, afai foi e pa'u o ia i le lua i le sapati, e le tago ea i ai, ma avae i luga? E le sili lava ea le tagata i le mamoe? O lea e tatau ai ona agalelei i le sapati" O lona uiga e tatau ona agalelei ma fai se galuega alofa i se tasi o manaomia le fesoasoani i le Aso Sapati. E pei foi ona faatino ai le auunaga a nai fomai i le Aso Sa, o le galuega alofa, o le galuega e lavea'iina ai se soifua o se tasi.

PESE: Come to Sunday school

A'OA'OGA:

1. Ia e manatua le Aso Sapati e te faapaiaina
2. E taua le fai o le malologa e maua ai se isi malosi faa sili.
3. Toaga e alu i le lotu i le Aso Sapati

.....

MANATU TAIALA O TESEMA: UA IA TE I TATOU LE ATUA.

O lea ua tatou aulia lenei masina i le manuia ma le filemu. E lē o so tatou faatuatua ua tele, ae o le alofa ma le agalelei o le Atua na auai ia te i tatou. O le pogai o faamanuiaga uma, ua tatou maua, o Ia o lo tatou malosi ma le ola. Ia tatou lagona le agaga faafetai ona o le auai mai o le Atua ia te i tatou i taimi uma ma aso uma o lo tatou ola.

ASO SA: **1 TESEMA 2024**

MATAUPU: **UA LIU TINO TAGATA LE UPU**

SINI: Ia malamalama le vasega o Iesu o le upu ua liu tino tagata.

TUSI FAITAU: Ioane 1: 1 – 5

FESOASOANI MO FAIAOGA:

Ua tatou tu vae i le masina o lo o fa’atalitali uma i ai le au Kerisiano i le afio mai o le Pepe o le Kerisimasi. O le Mesia na valoia, o le Tama o le faaolataga, o le Emanuelu, o le Atua ua ia te i tatou. O le Mesia na valoia e Perofeta e afio mai e faaola i lona nuu o Isaraelu.

I le molimau a Ioane pei ona i ai le Mataupu 1: 1 – 5, o lo o tautino ai e Ioane lona ia faatuatua, e uiga i le Iesu ua afio mai. E uiga ese foi le molimau a Ioane, e le pei o isi fai Evagelia o le Tala Lelei. E amata mai le faamatalaina e Ioane o le tala ia Iesu i le amataga o le foafoaina o le lalolagi. Sa i le amataga le Upu, sa i le Atua le Upu, o le Atua foi le Upu. O le Upu lea tamaiti, o Iesu lava lea ua liu tino tagata, ma ua militino ma le tagata agasala. O lona uiga e tusa ma le molimau a Ioane, o le Atua na i le amataga na faia mea uma lava, o Iesu lava lea. Ioe le fanau, o le Atua saili mai. O Iesu ua Afio mai, o le ata vaaia lava lena o le Atua ia te i tatou. O le tele o lona alofa, lea lava ua afio mai ai lava o Ia ina ia faaola ma lavea’i i tatou uma e ola i lona alofa tunoa.

GALUEGA FAATINO: Taligā Fesili

- 1. O ai le upu ua liu tino tagata?
Tali: (O le Atua e ala ia Iesu)
- 2. O le a le vaitau na tupu ai le liu tino tagata o le Atua?
Tali: (O le vaitau o le Kerisimasi)
- 3. O ai na fa’aaoga e le Atua e ala mai ai le Alii o Iesu?
Tali: (Na fa’aaoga Iosefa ma Maria)
- 4. O anafea na i ai le upu ua liu tino tagata?
Tali: (Sa i le amataga, o le Atua lava le upu)

PESE: Auā ua fanau mai, mo i tatou le tama

A’OA’OGA:

- 1. Ua ia te i tatou le Atua.
- 2. O Iesu o le Atua lava Ia.
- 3. O Iesu o le malamalama e ola ai.

.....

ASO SA: 8 TESEMA 2024

MATAUPU: UA FA’AALI LE AGELU IA IOSEFA

SINI: Ia malamalama le vasega, na usitai Iosefa i le agelu a le Atua.

TUSI FAITAU: Mataio 1: 18 – 25

FESOASOANI MO FAIAOGA:

E lē faigofie iā Iosefa le faafitauli ua tupu ia Maria, auā o lea sa faufautane pe na fuafua Maria e faaipoipo atu iā Iosefa, peitai o lea ua iloa e Iosefa, ua to o ia mai le Agaga Paia e tusa ma le molimau a Mataio. Tamaiti fai mai ua faatea lemu ese e Iosefa ia mea ma lona mafaufau, o Iosefa foi o le tagata amiotonu, e le i loto o ia e faamaasiasi ia te ia i luma o tagata. Tamaiti fai mai, a’o manatunatu Iosefa i ia mea, ua fa’aali mai ia te ia e le agelu mai lagi e ala i le miti. O le miti, o le tasi lea o auala na fa’aali mai ai le finagalo le Atua mo ona tagata, lea foi ua faailoa ia Iosefa. Talofa ua lē sili lava ia Iosefa lagona ma vaaiga faaletagata, ae ua ia tulai ma talia mea uma e pei ona faailoa e le agelu. “Iosefa e, le atalii o Tavita, aua e te fefe inā aumai ia te oe o

Maria lau avā, auā o lana to e mai i le Agaga Paia.” E le i toe faatali Iosefa ua ia tu i luga ma alu, ua aumai iā Maria ma avea ma ana avā.

O ai matua o Iesu? O Iosefa ma Maria. Ia lelei tamaiti, o le fa’aaogaina o Iosefa ma Maria, o lo la’ua foi lena sao i le Tala Lelei, auā ua auala mai ia te i la’ua le Pepe o le faaolataga. E ui i o la manatunatuga i le vaai a le lalolagi, ae ua manumalo le ola usiusita’i ma talia i le loto maualalo le finagalo o le Atua.

O le i ai foi i lenei Kerisimasi, o la tatou meaalofa sili foi lea le fanau mo Iesu. Ia tatou usiusita’i i o tatou matua ae ia sili ona tatou usiusita’i i le Atua ma faia Lona finagalo.

GALUEGA FAATINO: Faatalanoaga

Ia tula’i le tamaitiiti e faailoa po o le a sana meaalofa ua saunia mo lenei Kerisimasi.

PESE: Logo tagitagi

A’OA’OGA:

1. Ia faalogo ma usitai
2. O Iesu o le Pepe o le faaolataga.

.....

Manuia le Kerisimasi ma le Tausaga Fou